


蜀中名勝記

卷自二十六



風陵文庫  
文庫19  
F 70  
4





F0070-(4)

風陵書屋藏本  
澤田瑞穗

蜀中名勝記卷之十六

閩中曹學佺能始著

瀘州

漢江陽縣蜀志曰魏武屯漢中諸葛亮出屯江陽是也水經曰江水又東過江陽南洛水東南注之酈道元註曰江陽縣枕帶雙流據江洛會也漢景帝六年封趙相蘇嘉為侯國 洛水與綿水合至州西方山下謂之綿水口通志云廢綿水縣在綿水溪口汶江水中洲上梁置縣宋省入江安 洛水逕江陽謂之中江又謂之支江支江水從富義縣鴛鴦山出



方至城與汶川合流又有赤水溪從昌州  
流入去合支江 有合江在州治東蜀江與  
流處之溪源出仁懷縣其形曲折如之字 有悅江  
在州治東北源出戎縣諾武箐經悅州因名 有思  
晏江在州治西四里源出古思晏縣 有宋江在州  
治東百步源出大壩兒北洞經天州故名任汲記云  
淙流東北貫其隅矣 李壘西山堂記云郡得名爲  
瀘者蓋始因梁大同中嘗得治馬湖口置瀘州蓋馬  
湖卽瀘水下流因遠取瀘水以名州也志云宋制置  
使余玠遷州治于神臂山則在百里外號缺瀘城

勾公權瀘川縣解記云江陽氣候偏陽夏秋多炎  
燠冬無苦寒每夏秋蒸溽如傍挹火爐篝 孫義叟  
修城記瀘控西南諸夷遠逮蠻蠻最爲邊隅重地元  
豐以來用武臣其後始更置儒守錢若水以右贊善  
拜茲官宋太祖召見于武德殿謂之曰瀘川最近蠻  
獠尤宜綏撫蓋重之矣 方輿勝覽云整暇堂雅歌  
堂俱宋時建在郡圃之內四香亭在州治淳熙中郡  
守趙公建自題云永嘉何希琛之言曰茶蘼香春芙  
蓉香夏木樨香秋梅花香冬斯名以之有兩定樓取  
出師表語也陸務觀南定樓詩行遍梁州到定樓



年又作渡瀘遊江山重複爭供眼風雨縱橫  
一名海觀侍郎閣蒼舒詩雲南之陰大江東二水奔  
騰如海衝誰能具此壯觀眼南定樓中今卧龍 水  
經注江中有大門小門焉季秋之月則黃鱗死漚也  
郡國志瀘江水中有大闕季春三月黃龍堆沒闕卽  
平黃龍堆者昔尹吉甫子伯奇至孝後母譖之自投  
江中衣苔帶藻忽夢見水仙美樂揚聲悲歌船人學  
之吉甫聞船人之聲疑似伯奇援琴作子安之操按  
曹植之惡禽論韓愈之履霜操皆指此事志云州東  
三里歸子山相傳伯奇溺處 又云三國董允墓在

州治東今名董允壩 方輿云東巖在汶江之東紹  
興中邦人開創大像依崖不足以庇風雨近歲有庖  
者祁氏親死廬墓棄俗奉香火于此崖邦人信之不  
十年重樓複屋佛宮經藏甲於一境碑目黃太史大  
像記醉僧圖碑刻並在此巖之開福寺 州志云東  
二十里潭中擁一小堆相傳下有龍窟二水交流清濁  
不混每春漲其堆若浮州人遊賞之處通志云卽龍  
馬潭也唐王昌遇落魄仙授以道術比歸售馬送道  
童子澤前得馬乘之瞬息至家而馬化龍入潭潭上  
有冲虛碧梧二觀俱宋建 勝覽云龍女洞在



南二十五里高崖之畔有二穴俗傳爲龍女  
巖嘗遊有畱題 寰宇記云雙井在城西偏紅輿中  
掘濠塹得碑乃唐乾元中蘇德先所開 紀勝云滴  
乳泉在城西真如寺自崖石中流出味甚甘魯直經  
行大書此三字碑目云唐真如寺碑在本寺內山谷  
集云瀘州大雲寺西偏崖石上有甘泉滴瀝一州泉  
味皆不及也余名曰滴乳泉山谷又跋常山公書云  
常山公書如霍去病用兵所謂顧方略如何耳不至  
學孫吳至其得意處乃如戴花美女臨鏡芙蓉後人  
亦未易超越紹聖五年五月晦避暑瀘州大雲寺子

茂攜此書來妄意評之如此 寰宇記尹吉甫江陽  
人有祠在城南又報恩觀建清穆堂以祠之碑目許  
沆記周尹吉甫實生此地見於圖經舊矣陳帥損之  
作清穆堂祠焉觀酈道元水經注江陽異聞與華陽  
國志頗類其載揚雄琴清英敘伯奇流放并子安之  
操附于江陽雄蜀人也其說必有據 勝覽云寶山  
在城南初名堡子山爲巡檢解陳公損之移解山西  
建堂其上袁公說友榜其堂曰江山平遠易堡子爲  
寶山大書揭之下瞰城郭萬瓦鱗集兩江合流郡國  
志一名瀘峰山高三十丈地多瘴三四月渡



惟五月上旬渡之即無害故諸葛亮云五月  
李重西山堂記云以常璩華陽國志及辛怡顯雲南  
錄攷之諸葛渡瀘乃在越雋之地非瀘之寶山也水  
龍崖在寶山之趾有古榕木盤結天矯如龍黃魯直  
爲題榜 通志云瀘州寶山之瀘峰有武侯廟每歲  
蠻人貢馬相率拜于廟前宋劉光祖詩云蜀人所至  
祠遺像蠻徼猶知問舊碑紀勝云黃太史書砥柱銘  
碑在瀘峰高寺 通志云三泉在寶山嵌巖間昔王  
大過鑿山濬泉榜曰三泉 志云州南玄妙觀有紫  
房洞唐應靜煉丹於此丹竈石牀尙存有煉丹井亦

唐真人酌挹之所又云治南二里有懸崖石刻茶藤  
洞三字西南有飛雲洞爲唐庚讀書處按子西丹稜  
人徙居瀘之安夷門外自號魯國先生有文集行世  
寰宇記方山在州南二十里又名回峰其山八面  
下瞰江流有魏武帝廟唐玄宗敕文華陽國志云方  
山蘭祠昔漢光武微時過江陽有一子望氣者言江  
陽有貴兒氣王莽求之縣人殺之光武怒爲子立祠  
謫江陽人不使冠帶通志云巖池在方山之頂周圍  
一里有龍潛其中 勝覽云北巖在城北舊有小菴  
尙書楊汝明叙爲大刹又創五峰書院以爲書院



課之所 志云州北二里撫琴臺山石生成  
尺昔尹伯奇投江吉甫登其上鼓子安之操焉 又  
云州北有薑亭郡人王綸以母姜氏卒終身不敢食  
薑因植薑于亭側以志不忘 又云東北二十里特  
凌橋宋治平中有女子因母病歸省溪漲不能渡忽  
見一木橫凌水面遂舍生以濟既渡失木所在 通  
志州東北有餘甘渡唐子西瀘川六言云百斤黃鱸  
鱸玉萬戶赤酒流霞餘甘渡頭客艇荔枝林下人家  
又云拙溪在州東北七里黃山谷過而墜馬自以  
爲拙呼爲拙溪書大字于石見存 山谷有瀘州中

壩葛氏竹林留題云江南黃庭堅自夔道蒙恩放還  
元符三年十二月道出江安江安宰石諒信道以親  
親見留作歲建中靖國元年正月丙寅置酒中壩葛  
氏之竹林而別

江安縣

漢地理志犍爲之漢陽縣也注曰犍爲都尉治山有  
關谷漢水所出 今縣南七十里連天山漢水出焉  
又西南有漢陽山以在漢水之陽也廢漢陽縣當在  
此二山間 寰宇記云涇灘在江安縣南三十里灘  
上有山刺天瀑布飛洒相傳武侯誓蠻之地



南縣所爲設也縣有綿水鄉卽古之綿水縣  
江卽古之思晏縣 本志云有縣市有井市宋南  
渡後置南井監在縣東北監有鳳凰山山上有鴈塔  
刻唐五代以來進士題名 勝覽云偶住亭在江安  
縣北街建中初魯直自夔道還過邑宰石諒同遊此  
亭書琴操後改爲渡瀘亭碑目瀘州平夷記熙甯中  
范百祿撰今在江安偶住亭志云北城街有渡瀘碑  
亭宋時范百祿立自載其平夷事迹今碑止存篆額  
熙甯甲寅平夷之記八字 都巡檢使鄧巽陽安濟  
廟記曰吾邑城外汶江流其東清溪匯其左溪上陰

崖峭峙草木岑蔚下臨深潭蒼黯寒碧有神宅焉號  
曰五龍 紀勝云鏡子山在江安縣南五里又名照  
山一峰中峙兩峰旁翼二溪交流峰巒蔥蒨菴廬梵  
室金碧交輝旁有二潭爲龍所居禱旱輒應山有眠  
雲石龍淵橋玳瑁崖磨鎌溪爲一邑勝遊之地

#### 納谿縣

宋紹定初割江安之地而立納谿則瀘川縣所爲廢  
也納谿水源自阿永番部爲唐之羈縻納州納水所  
出焉流至縣之西門與瀘江合 通志云縣東一里  
有樓子山層峰疊嶂若樓閣然三里有撥旗



諸葛武侯豎旗于此以誓蠻人也又其遠者  
寨倒馬關石虎關則皆通牂柯且蘭交趾諸夷 本  
志云治西有寺其地產青白石似玉曰玉林寺又云  
治北十里爲舊縣基昔人掘得銅犧象樽一太和羹  
盃二爵三貯于學宮

合江縣

漢符縣東漢爲符節縣水經曰江水東過符縣北邪  
東南歸部水從符關東北注之酈道元註曰縣故巴  
夷地漢武帝建初六年以唐蒙爲中郎將從萬人出  
巴符關是也漢元鼎二年立王莽之符信 縣治安

樂水會水源南通甯州平夷郡營縣北逕安樂縣界  
之東又逕符縣下北入江漢縣長趙祉遣吏先尼和  
以永建元年十一月詣巴郡沒死成濡灘子賢求喪  
不得女絡年二十五有二子五歲以還至二年二月  
十五日尙不得喪絡乃乘小舟至父沒處哀哭自沈  
見夢于賢曰二十一日與父俱出至日父子果浮出  
江上郡縣上言爲之立碑其鰥部之水則未聞矣  
寰宇記安樂山在縣東五里八十步羣峰峭拔瀑布  
千尺天寶六年敕改爲合江山圖經安樂山在合江  
西五里三峰俱秀溪流遶其下有石匱爲仙



之所歧而左有爛柯跡後有仙影隱隱在石而右歷木楠臺仙人石十二盤至剪刀峽循山有八洞通南崖有石曰許由瓢又有芙蓉城滴水崖白猿洞此三峰之景也黃山谷記云安樂山劉真人飛昇之所真人字善慶初卜居時曰焚道平山氣濁而不清江安方山氣清而不秀求山之清秀惟安樂山耳乃居之碑曰高唐宗取丹經詔碑賜進經道士詔碑劉真人藏經碑俱在安樂山志云在本山經書峽中其峽峭削人跡不到世傳蜀有黃澤書在揚子雲之前藏于名山卽此峽也 吏隱閣記曰宋治平四年

鄧太師縉作邑于瀘川曰瀘之合江邑居之南轉清溪而上六七里曰安樂山世傳隋開皇劉珍先生登眞之地杜光庭傳李淑記開皇所置三觀其一尙在乃命道士作劉真人祠堂因名其閣曰吏隱志云安樂山俗名筆架山唐神童先汪有記今藝文不載惟載其一絕句云碧峰橫倚白雲端隋氏眞人化蹟殘翠栢不凋龍骨瘦石泉猶在鏡光寒任佞遊安樂山詩云安樂溪上峰萬木生翠羽孤撐切天心橫拓壓坤股氣勢西吞夷光芒南定楚雲泉出石竇淋漓灑玉宇煙蘿纏林梢搖拽垂翠組山有天符葉



大風雨拔去後得於容子山葉如荔枝而長  
宛如蟲篆或以爲劉真人仙跡蘇子瞻詩天師化去  
知何日玉印相傳世共珍故國子孫今尚在滿山秋  
葉豈能神 安樂溪側有呂光廟符秦時光討李益  
之亂于此李垢詩西涼宮闕化灰燼一時壯觀今何  
許又名登天王祠西南隅有之溪三遶筆架九遶文  
明過月臺迤邐而去望如秋練形如之字注于江  
南五里月臺山小溪旋遶山足形如臺面如新月  
坡上有晉王廟祀唐李克用又五里丁山形如丁字  
倒峙又曰文明丁火文明之象也有丁公廟其碑乃

蕭齊時立趙世延先氏書崖記云合江之北有神臂  
山呀然虛開清竅竦深廣袤百十步飛泉簾垂列巘  
屏矗嵐光林影映帶左右與塵囂迥隔山之麓卽先  
氏書崖志云鍊瀘城三里讀書崖父老往往過之聞  
書聲後神童先汪七歲至其地曰吾讀書故處也遂  
寢處其中爲九經注元虞集跋云涼國公勳業聞望  
著于天下我國家之著龜也年七十餘閑居金陵又  
以文章學問爲吾道砥柱其得于天而裕于人何其  
盛哉讀書崖之記序其源委博瞻考據鄉里晚生後  
進蓋有不及聞者吾蜀百千年故家舊族若



者多有之矣安得一一表章于大臣元老之  
先氏子孫所恃以不朽有不徒在于崖者也謝端跋  
云端蜀人也流離江漢間幾十餘年矣某山某水不  
知幾何所覽讀書崖之記始知先氏世有賢子孫哉  
端今老矣行於四方欲求一畝之居而不可得吾蜀  
多異人異書何時扁舟泝江而上從書崖嵐光林影  
之下求其遺書而讀之庶幾補過以希前脩汝礪其  
尚不吾卻也夫

蜀中名勝記卷之十六終

蜀中名勝記卷之十七

閩中曹學佺能始著

上川東道

重慶府一 巴縣附郭

山海經曰西南有巴國大皞生咸鳥咸鳥生乘釐乘  
釐生後照後照是始為巴人有國名曰流黃辛氏其  
域中方三百里其出是塵土有巴遂山澗水出焉又  
有朱卷之國有黑蛇青首食象郭璞註云今三巴是  
也後照乃巴人始祖辛氏即鄭氏出是塵土言殷盛  
也食象即巴蛇也 水經註曰江州縣故巴



蜀中名勝記 卷之十七  
按春秋桓公九年巴子使韓服告楚請與鄧  
始見傳文公十六年楚人秦人巴人伐庸實始見經  
及後七國稱王巴亦稱王華陽國志慎王五年蜀苴  
相攻苴侯奔巴巴爲請于秦秦使張儀救苴滅蜀儀  
貪巴道之富遂滅巴執王以歸乃城江州而置巴郡  
焉漢書列傳揚雄之先稱揚侯處于巫山至漢興其  
族遡江上居巴之江州卽此縣矣 兩漢巴郡東至  
魚復北接漢中西連夔道南極黔涪孝桓帝時刺史  
但望采文學掾趙芬等議上疏曰謹按巴郡圖經境  
界南北四千東西五千周萬餘里屬縣十四鹽鐵五

官各有丞史遠縣去郡千二百至千五百里鄉亭去  
縣或三四百或及千里刺史行部不到十縣大守行  
桑農不到四縣且江州以東墊江以西上下殊俗情  
性不同敢欲分爲二郡一治臨江一治安漢朝議未  
許獻帝初平元年劉璋始以墊江以上爲巴郡治安  
漢以江州至臨江爲永甯郡胸臆至魚復爲固陵郡  
巴遂分矣建安六年魚復蹇胤白璋爭巴名乃改永  
甯爲巴郡固陵爲巴東以治安漢者爲巴西於是  
有三巴之號按今地理沿舊但墊江猶屬巴郡耳 巴  
志曰漢世郡治巴水北有柑橘官今北府城是也



乃徙南城今南城坪是也

華陽國志云劉先主時都護李嚴大城江州週迴十六里欲鑿城後山自汶江通水入巴江使城爲州求以五郡置巴州丞相亮不許亮北征召嚴漢中故穿山不逮然造蒼龍白虎門別郡縣倉皆有城按治西十里佛圖關左右顧巴岷二江是李正平欲鑿處斧跡猶存今府城爲門十有七九開八閉以象九宮八卦故曰象龜首乃向塗山 水經曰江水又東北至巴郡江州縣東強水涪水漢水白水宕渠水合南流注之註曰強水卽羌水宕渠卽潛水渝水又云巴水

出宣漢縣巴嶺山南流歷巴中逕巴郡故城南李嚴所築大城北西南入江庾仲雍所謂江州縣對二水口右則涪內水左則蜀外水是也巴水亦名西漢水 寔字記云巴縣所理岷江之北漢水之南 李白

峨嵋山月歌峨嵋山月半輪秋影入平羌江水流夜發清溪向三峽思君不見下渝州司空曙發渝州卻寄韋判官詩紅燭津亭夜見君繁絃急管兩紛紛平明分手空江轉惟有猿聲嘯水雲 府治枕金碧山漢時分祀金馬碧雞處也宋淳祐中制置使余玠因舊址累爲臺曰金碧臺嘗草詩餘一闕隸友石



刻在治後式燕堂玠又嘗勅招賢館於府東偏  
曰有謀欲以告近則徑詣公府遠則言於郡以禮遣  
之館中供帳一如帥府焉 輿地碑目渝州有漢故  
益州刺史碑有延熙中嚴孝子碑有漢靈帝時太守  
張炳頌德碑俱云在郡治有劉宋義熙碑在岷江邊  
水淺涸始得見之見必有秋又名豐年碑 本志云  
郡學後蓮花壩有石麟石虎相傳爲古時巴君冢又  
云治北康村有小阜二十餘俗呼古陵亦曰巴子冢  
縣學有夫子燕居像有元文宗書萬里歸程四字  
故猶稱御書樓 梁書曰巴郡有地忽自開成井方

六丈深三十二丈圖經唐刺史皇甫珣於巴縣南鑿  
石六丈得泉號爲新井以別於舊井也 志云城內  
崇因寺有淨香亭修竹檀欒與金碧臺相掩映又云  
治平寺有石刻西山佛三字旁刻開山祖曰名祖月  
宋治平時僧也有羅漢先天二洞皆古洞又云城中  
有東華觀觀後有東華十八洞皆相通今土人呼其  
處爲神仙口相傳東華眞君于此得道又云五福宮  
乃城中最高處俯窺闔閭坐帶江流 寰宇記云  
塗山在縣東南八里岷江之南岸高七里周迴二十  
里尾接石洞峽劉備置關於此峽東西約長二里許



華陽國志曰禹娶於塗山今江州塗山帝禹之廟銘存焉又曰山有禹王祠及塗後祠陶弘景水仙賦云塗山石帳天后翠幙夏禹所以集羣臣也按倦游錄三門禹廟神儀侍衛極肅後殿一壇裘像侍衛皆胡人云是禹婦翁今不存 三巴記云塗山北水有銘書辭云漢初犍爲張君爲大守忽得仙道從此升度又云縣下有清水穴巴人以此水爲粉則皜耀鮮芳貢粉京師因名粉水故世謂江州墮林粉也今山下有清水溪卽其處舊有道院名清溪院清水穴左爲龍門峭壁中分瀑布下垂春遊汎艇必曲折經此渡

江而歸穴之右爲海棠溪溪植花木當夏漲時挈舟深入可數里而得幽勝矣水經注云江水又東逕黃葛峽山高險全無人居圖經云塗山之足有古黃葛樹其下有黃葛渡制置余玠詩云龍門東去水和天待渡行人暫息肩自是晚來歸興急江頭爭上夕陽船此黃葛晚渡作也 白樂天塗山寺獨遊詩云野徑行無伴僧房宿有期塗山來去熟惟是馬蹄知宋余玠詩木魚敲罷起鐘聲透出叢林萬戶驚一百八聲方始盡六街三市有人行則今之覺林寺矣 志云城西雉堞下有洞曰洪崖覆以巨石其下嵌空



瀑時至亦名滴水崖有元豐時蘇軾任仲儀黃庭堅題刻嘉泰中成繪于中起吏隱亭洪偁又起輕經亭焉 茅盈內傳曰秦始皇三十一年九月庚子茅盈高祖濛乘雲駕鶴白日昇天先是有巴謠曰神仙得者茅初成駕鶴上昇入太清時下玄洲戲赤城繼世而往在我盈帝若學之臘嘉平始皇聞之于是改臘爲嘉平也今治西有棲真洞在大茅峽相傳洞中曾息大茅君云 李膺益州記廣陽州東七里水南有遮要之埽石志云治東江澣廣陽壩卽廣陽州也字宜從洲此石江中突起俗名遮夫埽 華陽國志郡

東枳有廣德嶼有明月峽故巴亦有二峽也王維曉行巴峽詩云際曉投巴峽餘春憶帝京晴江一女浣朝日眾雞鳴水國舟中市山橋樹杪行登高萬井出眺迥二流明人作殊方語鶯爲舊國聲賴多山水趣稍解別離情杜甫渝州候嚴六侍御不到先下峽詩聞道乘驄發沙邊待至今不知雲雨散虛費短長吟山帶烏蠻闊江連白帝深船經一柱觀留眼共登臨益州記云遮埽石東二里至明月峽峽前南崖壁高四十丈有圓孔如滿月狀本志明月沱邊有高冢橫刻伯喈墓三大字按蔡邕曾遷巴郡太守不拜有



蜀中名勝記 卷之十七  
謝版云巴土長遠江山修隔宣暢聖化道遵和風非  
臣才力所能供給其墓未詳 過此有紫金山有寺  
名金紫寺又過此有古灘城爲巴子置津處又二十  
里有銅鑼峽以水響聲似之是涪岷水會處峽有關  
馮當可葬其上有圓石高懸 志云治西十里石壁  
繪佛像一徑僅容輿馬卽佛圖關也又三十里爲多  
功城宋末築有寺名多功寺門垣猶存寺有天池水  
又四十里爲長安洞秉燭深入可里許見雙石墩若  
龍過此則皆渟泓積水矣相傳崇因寺前居民屋內  
有洞與此通故崇因寺亦謂之長安寺也又二十里

爲東陽鎮唐置東陽城焉輿地碑目蜀廣政十五碑  
在東陽鎮市心卽此陳子昂入東陽峽與李明府舟  
前後不相及詩云東崖初解纜南浦遂離羣出沒同  
洲島沿洞異渚瀆風煙猶可望歌笑浩難聞路轉青  
山合峰迴白日曛奔濤上漫漫積浪下沄沄倏忽猶  
疑及差池復兩分離離閒遠樹藹藹沒遙氛孤狖啼  
寒月哀鴻叫斷雲仙舟不可見遙思坐氤氳又合州  
津口別弟至東陽峽步趨不及詩江潭共爲客洲浦  
獨迷津思積芳亭樹心斷白眉人同衾成楚越別島  
類胡秦林岸隨天轉雲峰逐望新遙遙終不見默默



坐含嘖念別疑三月經遊未一旬孤舟多逸興誰共  
爾爲隣峽之隔岸亦名龍門有石刻是江津縣龍門  
灘 圖經縉雲山在縣西北百三十里其山高聳  
多林木下有溫泉分東西流相傳黃帝於此合藥陶  
弘景水仙賦曰層城瑤館縉雲瓊闕黃帝所以觴百  
神也方輿勝覽卽謂之巴山矣宋靈成侯廟碑云此  
山出于禹別九州之前黃帝時有縉雲氏不才子曰  
混沌縉雲氏高辛氏亦有不才子八人投出于巴賓  
以禦鬼魅名基於此山有九峰寶塔峰最著亦阿育  
王塔八萬四千之一也迦葉尊者于九峰頂上示一

十三足又飭袈裟印文於獅子峰 按感通錄縉雲  
寺卽古相思寺也以此山有相思崖生相思竹形如  
桃欒 吳均春秋渝州西百里相思寺北石山有佛  
跡十三皆長三尺許闊一尺一寸深九寸中有魚文  
在佛堂北十餘步貞觀二十年十月寺側泉內忽出  
紅蓮花面廣三尺遊旅往還無不嘆訝經月不滅高  
僧傳隋無相禪師渡笠唐慈印禪師受記二龍處  
縉雲傳勝錄云宋初慧懽禪師住持太宗皇帝御  
誦梵經二百四十函真宗咸平元年迎至寺景德中  
勅改崇教寺封慧懽爲慈印大師有慈印師遺誠碑



咸平三年二月二十七日立凡十三則有熙甯三年  
提點夔州路諸州刑獄江中行立石界約秘書有權  
渝州事都官宋構藏經記按宋史仁宗天聖元年三  
月庚辰涪陵相思寺夜有光出阿育王塔舊址發之  
得金銅像三百二十有七則此山在宋時稱極盛矣  
山麓溫泉懸崖湧出四時騰沸中有遊魚數十尾  
人皆見之宋推官彭應求詩云公程無暇日乍得宿  
清幽故覺空門客不生浮世愁溫泉喧古洞寒磬度  
危樓徹曉都忘寐渾疑在沃州周茂叔艤舟其下刻  
之于石方輿勝覽載縉雲先生馮時行詩云借問禪

林景若何半天樓殿冠嵯峨莫言暑氣此中少自是  
清風高處多岌岌九峰晴有霧瀾瀾一水遠無波我  
來游覽便歸去不必吟成證道歌 圖經云西南百  
里涪江中有魚石鹿石俗呼魚鹿峽以形肖也 杜  
光庭錄異記曰江州縣南五十里沱江山下有七里  
店其處夜常有光十餘枚如流星環石或聚或散石  
亦有光乃珠胎於此或人見而密識其處遲明尋之  
便不得 志云治南六十里冠山多古寺有仙侶洞  
洞中石牀石傘儼如刻畫又十里爲大華山有荔枝  
禪院按華陽國志江州縣多荔枝園熟時二千石常



蜀中名勝記 卷之十七  
設廚膳命士大夫共會樹下食之今樹已烏有而院名無恙也

江津縣

南齊時爲江州縣理寰宇記所稱夔溪口是今呼南溪溪源在縣東南合岷江遶治如几亦名几水 四夷縣道記云自江津路南尋夔溪水路往南平州卽此 周地圖記七門郡置在夔口今之七門灘也志云在縣西七十里有七石橫江中 志又云治西有石門號龍門灘卽龍門峽也按陳子昂龍門峽詩曰龍門非禹鑿詭怪乃天功西南出巴峽不與眾山同

長竇互五里宛轉若嵌空伏湍煦潛石瀑水生輪風流動無晝夜噴薄龍門中潭河勢不測藻葩垂彩虹我行當季月煙景共春融江關勤亦甚巖壑意難窮誓將息機事煉藥此山中 志又云縣西十里有古石羊驛其地亦名石門對江壁上鐫大佛有大佛寺故相張無盡所剏亦名無盡菴旁有亭翼然據大石而藏茂林修竹中客登之徘徊四顧南有鼎山東有天池北有馬驍其高各刺天中突一峰名箕星尤奇特邑聚橫前萬瓦鱗列大江從西來委蛇曲折濯流杯池激跳蹬石直注亭下鷗鷺往來在煙波杳靄間



清絕不可名狀 宋知縣事冉木震碑云廳事後有  
合抱荔枝唐人所種每熟時令學士大夫會食樹下  
猶有漢之遺風荔枝舊有亭亭中碑刻歲久剝落想  
涪亭卽舊址也昔黃魯直過江津與馮壽李子善其  
樂閒堂記爲馮作也魯直與王觀復書云梓州李子  
任道流寓江津二十餘年言行有物叅道得要老成  
人也山谷晚號涪翁亭名想涪寄遐思耳 圖經縣  
北有巴子養魚池神龍是潛志云在岷江南十里有  
長池廣袤五丈四時湛然范景仁墓居其北按流寓  
傳范蜀公居縣之長池里又云居樓臺山山在治西

有范鎮村 碑目云剛直御史之墓虞允文爲杜莘  
老書按碑在縣之杜村有紹興乙亥右朝奉郎守司  
農少卿杜莘老題次乾道丙戌杜宗甫磨厓宗甫卽  
莘老拾遺之後也自青神僑居于此又蘇伯瑜者叔  
黨之後亦自眉山僑居縣之聖鐘里東坡書歐陽醉  
翁亭記真蹟尙藏其家 李膺益州記云江州縣西  
南有仙池昔有仙人於此池側置樓而居多植香草  
於樓下一夕忽縱火焚其草天降紫雲飄然而去後  
人指此地爲香草樓志云在今治西南三十里 志  
又云唐大聖寺在縣西七十里按太平廣記東蜀大



聖院一木像製度瓌異耆老云像自荆湖泝流而上  
歷歸峽等郡所過多具舟楫取千夫牽挽不抵岸流  
至渝州州人焚香祈請應聲而往建此院安置焉  
異物志云在昔天旱水泉皆涸有姑氏病渴思得甘  
泉其婦徬徨至周望山下遇一叟曰能與吾釵則泉  
可得婦拔釵授之墜于地而泉出至今磧中餘淺水  
一泓周五六尺有金釵影一雙按在縣西之周溪上  
婦亦周姓 又云昔有飛鳥啣僧衣袖僧異之隨至  
石隙中窺見一金注子手不能及鳥復啣一枝與僧  
因得取注顧視啣枝乃苦檀木也其處在治北五里

碑目縣南三里跳蹬磧石壁上鐫云乾道辛卯正  
月十九日天水趙宜之陪王屋李希仲太原王直夫  
同寺首珍況來遊飲不至醉王屋李孝友書按此卽  
蓮花石也在江中不恆見見則歲豐 巴中記曰江  
州縣有峰窮峽按在今縣東七十里珞璜鎮渝志云  
五十里有西山石壁上刻終古礙新月半邊無夕陽  
之句志又云近時盜發王居士墓墓中鐫二詩云官  
無名字私無債架有衣裳廩有儲只此便同天上樂  
不知天上又如何又芳草烟村宿雨收牧童歸去倒  
騎牛笛中一曲昇平樂弄得生來不解愁此墓在縣



蜀中名勝記 卷之十七 十三  
南一里居士亦不知爲誰

壁山縣

宋李濬壁山普澤廟記云國朝蜀分爲四而方各有鎮由劔之裏爲七曲劔以東爲白崖劔以西爲玉壘自蜀而下爲渝則有壁山是四山者如蜀之鎮一道生靈之司命也 寰宇記云四面高山中央平田周迴二百餘里唐天寶中諸州逃戶多投此營種川中有一孤山西北二面險峻東南削平土人號爲重壁山五代史後梁乾化三年五月壁山騶虞見二鹿隨之歐陽永叔嘆以爲異也

永川縣

縣有蓮池壩二巨石崇聳欲合平衍可半里許石竅中出水滙而爲小池世傳蓮子從石竅中出而生蓮不由栽植又有石松坪在來蘇鎮有松化石石質而松理或二三尺許大可合抱然不過相望數山有松俗呼雷燒松杜詩所謂萬年松化石者卽此 志云鐵山鎮在治東三十里趙抃過鐵山鋪寄交代吳龍圖詩暫留山驛又晨興西望旌麾想舊朋三院筆簪曾對直兩川兵印復交承年光頭鬢華如雪世態心情冷似冰境上憑詩馳遠意青泥寒曉入雲登又云



六十里有牛尾驛鄭國華留題云龍尾道中退朝客  
雕鞍寶馬黃金勒誰憐遠使足馳驅夜半孤村牛尾  
驛

### 榮昌縣

譚用之榮昌記云巴叢之饒谿交水橫列岫羅巘瓜  
瓟不斷詩紀云河梁望壘頭分手路悠悠徂年驚掣  
電別日欲成秋黃鵠飛飛遠青山去去愁不言雲雨  
散更似東西流此梁江總別袁昌州作也勝覽云唐  
段建中太尉文昌之父嘗典榮昌二郡事見李德裕  
成都資福寺記唐守之可考者惟建中楊瑄李師望

韋君集四人而已唐史載大曆中韋君靖爲榮昌令  
值黃巢兵起君靖引兵從征動以信義所向克捷累  
官尚書僕射 碑目云演教院碑在昌州舊基院  
有斷碑載唐咸通歲縣令唐允中又云六十四卦象  
碑在昌元縣又云淨土院碑在昌元縣東四十里唐  
太和五年建又云昌州北二十里亂石灘有唐人碑  
刻曰龍灘其溪深遠千餘丈世傳古有龍行石裂成  
溪因名 大抵昌州今之舊州壩是昌元里卽唐昌  
元縣地也今榮昌乃古寶蓋鎮志云南一里曰寶蓋  
山有臥佛寺壘形如皂蓋圓淨明朗聳翠炫奇



楊子謨顯惠廟記靜南山水奇秀士大夫避地者多居焉仙靈逸迹尙有董葛之遺風按志云縣東二十里曰葛仙山相傳漢葛孝先受左慈術於此修煉又有峰腦山山巔有白石如羣羊狀下有石洞亦葛仙修煉處崖畔有巨石突出石縫中生桃一株高丈餘葉幹與凡桃異花實不常國朝宣德中桃實各圍丈許紀勝云縣南二十里老鴉山有李戡李幾兄弟故宅二李善碁會虜索碁戰詔求天下善弈者蜀帥以戡應詔虜望風知畏不敢措手文路公贈以詩曰昌元建邑幾經春百里封疆秀色新鴨子池邊登第

客老鴉山下着棋人

大足縣

唐光啟以前昌元是昌州光啟以後則昌州理大足縣左有碑字畫模糊大略是昌州郡孔目題名也碑目云六經圖碑在郡學郡人楊甲鼎鄉所著又云漢王方平古碑顏魯公書在舊學今徙爲別刻字尙在碑陰冷齋夜話載有人調官都下踰年始得昌守已而求易便郡有淵才者聞而往見之曰昌佳郡也官欲易地有之乎曰然淵曰誤矣曰奉給優乎淵曰否訟簡乎淵曰否然則奚誤曰海棠患無香獨



靜南者有香非佳郡而何故昌號海棠香國土人云  
地宜此花易植易蕃郡治香霏室一老樹重趺疊萼  
每花或二十餘瓣花氣穠郁餘不能及也 志云縣  
之東禪寺有宋徽宗手碑西禪寺晉永和建寶頂寺  
唐柳本曾學吳道子筆意環崖數里鑿浮屠像奇譎  
幽怪古今所未有也 志又云老君洞在治東南二  
十五里玉口山巔洞弘敞可容十餘人內石牀石曰  
丹竈尙存洞巔一隙透明有泉自石罅中流出山麓  
惟一小徑可通相傳老子煉丹于此 又云寶珠溪  
在治南四十里唐貞觀時漁人郭福者夜捕魚見水

際有光卽之有蚌如斗剖得珠徑寸獻之太宗賜以  
積善井碑碣存 又云北巖在治北三里唐韋君靖  
建砦其上曰永昌有石刻沿巖皆浮圖像輿地碑目  
云吳季子墓碑在北山相傳以爲孔子書開元中殷  
仲容奉詔摹搨大曆中蕭定移刻潤州有張從申題  
其後又云高祖大風歌碑在北山又云古文孝經在  
北山凡二十二章與今文十八章小異王象之曰今  
文先出於漢初而古文與尙書同出於孔子壞宅今  
文已盛而古文獨不列之學宮惟孔安國馬融爲之  
傳及明皇注今文十八章孝經古文益微矣司馬光



范祖禹皆曾校進光謂始藏之時去古未遠其書最  
真祖禹又爲之說亦云古文應得其正 碑目又云  
唐韋君靖碑在北山乾甯二年靜南令胡密所作按  
胡密永昌寨碑云永昌寨者君靖韋公所建也頃乾  
符之際天下騷然旱蝗相仍兵戈四起公覩茲遐僻  
民不聊生遂令置義兵安戶口抑強扶弱務織勸耕  
足食足兵以殺去殺自黃巢侵陷京闕鑿輿出幸成  
都四海波騰三川鼎沸韓秀昇勃亂黔峽侵軼巴渝  
公迺統率義軍討除逆黨值秀昇盡挽舟楫圍逼郡  
城公迺詳度機宜上下欄截依山排障背水布兵兩

面夾攻從中剪撲賊勢大敗我武維揚渝牧田公備  
錄聞奏迺進忠節檢校御史大夫除拜普州刺史值  
川師效逆帥臣專征公又收復合州絕其枝蔓加右  
散騎常侍拜合州刺史洎鄭雄僕射失律廣漢山行  
章尙書攻圍當州故太尉顧公屢降命旨頻招延  
公統領精銳二萬餘人虔告耄龜申令士卒竝破二  
十七砦殺戮五萬餘人上聞偉績特加檢校工部尙  
書拜當州刺史克昌普渝合四州都指揮使加刑部  
尙書右僕射公以臨郡歲久迺思退居上表陳情宸  
衷未允特旨量留加金紫光祿大夫檢校左僕射扶



蜀中名勝記 卷之十七  
風縣開國男食邑三百戶屢膺鳳詔哀部魚符政懋  
穎川化隆河內邑有箱倉之咏俗多襦袴之謠求瘼  
之念彌堅去害之心益切其於駕馭英傑取舍毫釐  
重仁義如丘山輕金帛如泥滓憐孤恤老濟弱扶危  
行旅如歸遠邁鄭莊之驛遊人若市悉登漢相之門  
其拯綏四方乃如此也每遇良辰美景月夕花朝  
管絃以追歡啟華筵而召侶周旋有禮揖遜無譁罇  
俎不空座客常滿王衍之冰壺轉瑩嵇康之玉岫甯  
頽其禮讓謙恭有如此也至若立功立事爲國爲民  
或身提黑槩或坐運玄機身先士卒首挫兇徒謀必

十全舉無遺筭其剛毅果敢又如此也當夫賞功誅  
罪激濁揚清甄獎功勤黜棄私黨二異感德萬眾歸  
心其恩威刑賞有如此也公以海濤未息雲陣猶橫  
常願驅脅安置左綿載實倉庾奔衝遂府使牒呼逼  
邊檄征行然士馬雖精如柵砦未固何思大易習  
之義徵王公設險之辭迺於景福元年歲春月卜築  
當鎮西北維沿岡山建寨茲山上摩掩靄下抗平  
原矗似長雲萃如斷岸崖巘重疊磴道崎嶇一夫荷  
戈萬人失據由是芟蕪草萊相度地形人力子來畚  
鍤雲至連費比屋萬戶千門高亢濬流烟籠粉堞霧



捧朱樓龍吟笳角之聲雷動鼓鼙之響而又良工削  
墨心匠設規築城堡二十餘間建敵樓二十餘所遙  
瞻天際非龜城之可倫高倚雲間豈蜃樓之能擬其  
上則飛泉迸出綠水滂流崢嶸一十二峰周迴二十  
八里蓋造化之凝結豈金湯之比倫況糧儲千年兵  
屯萬數遐邇徵休軍民胥慶耕織無妨徭役不缺可  
謂一勞永逸有備無患者矣其軍中節級將校等賢  
深達機略博識古今有如同志弟兄異姓骨肉一心  
報國戮力從軍咸奉渥恩皆沾爵賞或崇帶劔或位  
專城或榮授金貂或職兼霜憲雅荷際會允屬休明

請列署石御庶不墜勳業云爾乾甯二年乙卯十二  
月朔日癸未十九日辛丑記

蜀中名勝記卷之十七終



蜀中名勝記卷之十八



蜀中名勝記卷之十八

閩中曹學佺能始著

重慶府二

合州

三國志先主詣劉璋取道墊江入涪華陽國志巴子時雖都江州或治墊江又曰墊江在巴郡西北中水四百里  
有桑蠶牛馬漢時淳于長甯雅有美貌黎夏杜皆大圖經云魏之合州石鏡縣隋之涪州涪陵郡唐之合州巴川郡宋之合州石照縣皆理此方輿勝覽州南百步內江水心有石屹立正圓如月其根巖



巖如雲捧之謂之石鏡冬出水可三丈碑目云涪內  
水石鏡題名云大曆三年此石出兵甲息黎庶歸六  
氣調五穀熟刺史兼侍御史王鋌記按石鏡石照縣  
俱以此名 魏華父瑞應山記云景德閒合州瑞應  
山出異木文理成天下太平字志云瑞應山在州後  
濮子墓在其上光教寺在其下寺今爲州理所 方  
輿云張柬之守合州姚崇薦其沈厚具相才故州治  
有沈厚堂今名景厚本此堂中篆繫辭八字字徑四  
尺李陽冰書碑陰爲孟泉石經周禮數段 碑目云  
李當塗篆龍門鳳穴司馬君實書公生明蘇唐卿篆

蒙泉竹鶴等字俱嘉定閒李元庚刻在治北薊林岩  
上治西鶴鳴里有招鶴亭三字宋徽宗書按志宣和  
閒許生舉進士愛其隣人朱受家羣鶴起亭作詩招  
之鶴果來集朱憤而愬諸朝上命均之鶴以離羣悲  
鳴不已道君爲書亭額賜焉 州有永清里里有  
夜雨寺僧智果所居取李義山巴山夜雨之句也又  
有墊江里里有龍骨寺爲龍蛻處巴中記云墊江  
多龍 志云周元公判州事嘗與客弈一老人來觀  
口流涎而香公驚問曰汝龍也何以至此老人曰安  
知之公曰以涎知爾忽大雷電起老人化龍泝溪而



蜀中名勝記 卷之十八 二  
上公乃令琢方石二十四片以鎮之今通曉橋是其處在城內之明月街 晁公武清華樓記曰合州其山龍多銅梁上接岷峨下繞甌越屬海而止所謂南戒者也水則涪水嘉陵合流城下貫江沱通漢沔引眾流入于海所謂南紀也 水經注云宕渠水亦名潛水又名渝水俗謂之渠江寰宇記云渠江水在縣北十五里源自萬頃池分來經巴達渠廣安等界至本州東北與嘉陵江合卽西漢水勝覽云西漢水在石照縣東百步戰國策所謂漢中之甲輕舟出於巴乘夏水下漢四日而至五堵也其源發西和州徼外

徑階沔又逕大安軍利見閬果與涪水會 蔡松年南北史補云吐谷渾主登其國西疆觀墊江源問水所經長史曾和對曰此水經仇池過晉壽出宕渠始號墊江至巴郡而入于江度廣陵會于海主嘆曰水尙知歸吾獨無所歸乎乃遣使南通于劉宋 志云會江門樓卽唐之會江樓也杜詩君今起柁春江流余亦沙邊具小舟幸爲達書賢府尹江花未盡會江樓范成大詩井陘東出縣山河古合州木根掣斷岸急雨洗江流關下嘉陵水沙頭杜老舟江花應好在無計會江樓文苑穆員送合州徐使君序云二月中



節時方宜人柳先攀折而垂水待臨泛而滿花迎酒  
客而笑鶯隨詩人而咏亦會于江樓矣 方輿勝覽  
云直郡治之會江樓有學士山其高不能踰傍山而  
南峰斜崖諸山班班若出其下亦甚異也山麓有張  
氏荔枝異本合榦唐文若曲端嘗賦之 勝覽又云  
石照東北七里東臺山漢末薛融讀書處東十里東  
山趙子伯章別業有東山二字廣丈餘西二十里牟  
山唐康元朗讀書處 舊經云合州北崖在州北五  
里或以古濮國附會爲濮岩非也岩有古栢數十章  
率圍八九尺有定林院歲正月九日郡以故事設宴

於此遊人盛集又有荔枝閣沿崖鑄象設古意生動  
及古賢題刻甚多又有濮湖在岩下雖傾圮古隄及  
岩上刻字猶存岑象求定林院詩野闊蓮宮迥樓臺  
半倚山地連巴峽近門對濮溪灣栢徑松烟濕岩房  
雨蘚斑白雲邀客住明月伴僧閒經梵喧譁外香燈  
杳靄閒勝遊或邂逅危構喜躋攀世路長何極塵心  
久欲還輜車正催發緩步出重關元祐五年太守劉  
象功作濮巖銘其序云距城三里有僧舍依大江林  
麓樓觀聳出如畫者伏於縑素聞其絕俗幽邃歷歷  
可指予幼時侍先君嘗遊今被命領郡復至其所憮



蜀中名勝記 卷之十八 四  
然有感親懷舊之嘆因作銘書諸巖石云合之二川  
河漢發源極地通天浩渺東傾奔龍竄鯨吞夔走荆  
上有蒼巖喬松古杉陰晴撲藍飛巖斷壁烟昏霧塞  
溟空嶽圻巴濮鄰國氣象相賊爲狼爲貊劔血初蝕  
二王滅迹雲間晝寂世變茫茫山空地荒鳥剝獸藏  
創業其時鑿高構危立剝開基在昔幼冲侍於先公  
曾步巖宮帝命惟汝克蹈前武得治茲土馳馬歲久  
江中惟舊中懷孔疚勒銘其巔子承孫傳與山齊年  
輿地碑目石照北巖廬舍那佛題名云敬造廬舍  
那佛一軀菩薩二軀唐長慶三年歲次癸卯三月十

九日銀青光祿大夫使持節合州諸軍事行合州刺  
史兼御史中丞劉溫溫自幽燕而來從左羽林軍使  
改授此記之歸正寺岩 又云石門彌陀像開元二  
十三年州別駕張釗爲刺史孫希莊作 又云關詠  
永言王皙微之李儀表臣皇祐壬辰寒食日來 又  
云崇甯丙戌歲時雨霑足因觀民田率巡檢高公綜  
仲實石照令王叔陵仲陞法曹馬師古宗道主簿姜  
宇定中同行至此早饒重午後一日郡守李樂道題  
又云馮茂恭邵商民唐立夫紹興乙亥十月癸巳  
同遊 又云宇文休冉德濟閻文叔呂達夫乾道己



丑三月廿四日來遊 又云濮巖東州勝處乾道辛卯立秋杜國光偕趙彥和馮廷式及其弟慶遠酌歲寒亭 方輿勝覽云釣魚山在石照縣東十里涪內水在其南西漢上流經其北郡人遊者以舟下涪水艤而上已乃繞山北沿西漢水而歸此遊觀之奇也山南大石砥平有巨人迹相傳異人坐其上投釣江中山以是名下有大刹曰護國寺歲二月八日太守率僚屬宴集于此志云釣魚山東西南三面據江峭壁懸厓安撫使余玠於山建城以禦胡元故又呼釣魚城也上有天池周五百餘步後有石菴凡二十四

片石鑿成開山石頭和尚所剏西南隅有祠奉李忠宣公德輝蓋安撫王立之義妹李氏在圍中忠宣奏闕得保全其人民云元人登釣魚山詩臺倚層巒萬仞高魚龍面面湧驚濤振衣更切臨淵想擬選長竿學釣鼇又峰頭借得月爲鉤把向江心自不收莫笑山人似綠木磻溪元是釣西周又遺庵故傍唐僧塔荒壘猶餘宋戰場讀罷題詩聊騁望半江寒霧送斜陽 輿地碑曰眉山王魯望萬里西歸艤舟合陽趙濱甫侯德之定之孫相之載之相與游釣 漁秋雨初霽心意豁然酌酒臨江興盡而返 又云眉山家漁



歸以嘉定乙亥七月九日訪釣魚小供因留詩石上  
暫脫塵羈入古藍西風送我與禪參漲開二水虬朱  
鬣嵐隱諸峰玉碧簪兩武深痕墮塵跡一椎打就躡  
雲庵自憐把釣人多老消息遙遙自渭南 又云紹  
熙改元郡守汲國呂交修無棄以清明日率長安母  
如愚子發長江杜几伯扶資中馬三捷周臣普慈楊  
文彥章蓬溪趙君瑞族人郁某既放舟來尋釣魚城  
之勝積雨初霽放懷舉酒男鑿仁姪近仁明仁與仁  
偕麟孫住僧侍行其旁有閩人朱渙詩云釣魚磯上  
着閒身胸次應無一點塵偶爾不逢周漢主此心端

弗愧前人紹熙辛亥臘月既望 又云東沂尉行之  
輔之約晉國趙資深才父遂甯陳子龍益昌王國秉  
錦官王正仲乙卯慶元仲冬來遊 又云眉山李壁  
來遊甥劉冲之族子潮俱慶元三年旬日 又云新  
南劍州使君三衢徐公以今春解南昌之組治舟合  
陽避夏秋水漲以良月甲子解纜西歸攝郡僉李忠  
父偕同僚史仲立趙季紳梅君用張子信何文振張  
通叔白德章劉光父晁季子饒別於此 郡國志云  
巴城在漢南江是楚襄王滅巴封其子爲銅梁侯故  
有此城方輿勝覽云石照南五里有巴子城乃周武



蜀中名勝記 卷之十八  
王封其支庶處在涪江南銅梁山下縉雲馮時行序  
謂山有茶色白甘腴俗謂之水茶甲於巴蜀元和志  
謂其多玉蕊花桃竹杖也 寰宇記云銅梁山在石  
鏡縣南九里東西連互二十餘里山巔平整環合諸  
峰此其獨秀者圖經有宿雲崖方崖松風閣讀書堂  
博古齋諸勝趙伯宜之別業也 志云山在州南五  
里石梁橫互其色如銅崖鑄銅梁山三字有石洞深  
丈餘有石牀可坐十餘人唐閩丘道人居此五十餘  
年迺化去棋局丹井猶存題名于洞壁者有閩州城  
南果何在永州澹巖天下希使山谷見之當復作何

等語紹興癸酉春九日韓國趙善敏渡澤王季蒙普  
慈馮憲來 又梁叔解組舟過合陽奉同登銅梁地  
主趙周祐鄉人王彥澤梁公行家姪方叔俱來紹興  
二十九年四月癸巳景和仲書 又魯國趙彥博富  
文從元憲兄造銅梁山觀洞天石室丹臺靈泉茂林  
修竹之富仙境宛然追思周祐兄清標高致今已隔  
世恨不當日得陪杖履周祐乃元憲仲弟其子師美  
敦書樂善予子信常與之同僚知有子矣是晚元憲  
具酒殺於洞靈之道院道京師陝西事談論宏偉衰  
袞可聽吾宗之英也元憲之子師儒師老侍皆孝友



蜀中名勝記 卷之十一  
恭儉克其家者日既夕乃歸淳祐二年五月十三日  
題 蜀都賦云外負銅梁劉孝威詩銅梁不可攀孔  
德紹詩銅梁忽背飛王維送李員外賢郎詩少年何  
處去負米上銅梁借問阿戎父知爲童子郎魚牋請  
詩賦幢布作衣裳蕙苾扶衰病歸來幸可將晁公武  
將發合州詩銅梁山昏空翠重石鏡水落灘聲遲皆  
此山也 寰宇記云隋析石鏡置赤水縣以赤水出  
其源也按志州西百餘里有赤水鄉赤水縣址存王  
象之碑目云唐令長新戒在赤水縣開元二十四年  
立玄宗嘗擇縣令百六十三人賜以丁甯之戒其後

爲縣者皆以戒刻石集古錄取焉景祐中令重刻之  
今非唐故物矣又云雁塔題名在赤水縣廨宣和閒  
柳瑊始刻置長安慈恩寺此蓋搨本也又云赤水縣  
龍多山唐人刻字此山高明窈深變態萬狀下視涪  
水如帶烟雲出沒山之偉觀也又云祭龍多題名天  
寶十四載十月十一日大中大夫守巴川郡太守眞  
甯縣開國男上柱國賜紫金魚袋韋藏鋒準制醮祭  
又云唐孫樵龍多山錄舊刻剝闕元祐七年劉象功  
再書遒勁可喜又云集聖院記在赤水縣之龍多山  
唐咸通閒李稽作又云龍多山鷺臺院紹興二十二



平十一月縉雲馮時行記略云龍多山有至道觀觀東大池爲則天后放生池中峰有鷲臺佛慧二院院栽萬竹竹徑圍尺有仙栢圍丈有二尺中空而柯葉敷腴有靈山院泉自崖出瀦爲方池大旱不竭有駕鶴軒下視涪水如帶焉 圖經云晉永嘉三年馮仙舉家十七人於龍多山昇去按卽馮蓋羅也今仙臺觀其燒丹處至道觀壁閒其繪像存焉馮時行詩云兒童便讀山中記老大才登記裏山何麟詩世路聲牙赤水過故升天險問龍多彭應求詩一望東川盡數州依崖泉石更清幽不辭挹月披雲卧攬取山房

一夕秋註云山遠且高透迤如龍蟠故曰龍多也涪江在其下去州百二十里 寰宇記青石山在石鏡西二百二十里涪水之南漢時山裂之處至今猶存李膺益州記云昔巴蜀爭界久而不決漢高八年一朝密霧青石山爲之裂自上及下破處直若引繩焉於是州界始判上有古祠靈於水旱華陽國志所謂青石神也 予觀孫樵龍多山記云梓潼南鄙越五百里其中有山崛起中天卽山之趾得徑委延舉武三千北出其巔氣象鮮妍孕成陰烟屹石巉巖別爲東巖槎牙重複爭先角逐若絕若裂若缺若穴突者



虎怒企者猿踞橫者木仆挺者碑豎又有似一飛簷  
連軒櫺櫺交攢欹撐兀柱懸棟危礎殊狀詭類愕不  
得視下有畝平砥若戶庭攄乳側脈膏渟泓石俯對  
絕壑杪臨蘭薄仙臺標異藪石負起屹與山別猿鳥  
蹟絕腹竇而空路由其中斷齟相望攀緣上下闐然  
而出矐見白日始時永嘉飛眞蓋羅玄踪斯存石刻  
傳聞丹成而仙駕鶴騰天一去遼廓千載寂寞澄泉  
傳靈別壑絕明風閑境清寂寞無聲佳木美竹岡巒  
交植風來怒黑雷動岩谷山禽巖獸捷翻互鶩曉吟  
喧啼聽之悽悽迴環下矐萬類在目因山帶川青縈

碧聯莽蒼際天杳杳不分月上于東日薄于泉魄朗  
輪昏出入目前其或宿霧朝雲糊空縛山漠漠漫漫  
莫知其端暘曜始浴徹天昏紅輪高而赤洪流激射  
濃透薄釋綿裂綺折千狀萬態倏然收霽樵起來而  
遊泊車而休登降信宿聞見習熟始曰山乎曾未始  
有得乎無處夸世釣名者污此巖扃乎且欲聞于穎  
陽之徒乎

銅梁縣

川曰巴川以水遠其治前如巴字 山曰巴嶽以峰  
高出雲表如嶽勢 碑目云古書巖在巴川縣石



閒隱隱如篆文不可讀又云季札墓銘在巴川縣相傳以爲孔子所書 紀勝云縣東里許丘曰羅暎名東巖宋馮倓記云歲星位于泰熒惑位于衡太白位于華辰星位于常鎮星位于嵩而羅暎計都二星位于巴嶽之旁昭然可考也 勝覽云南峰在巴川縣東四十里高五里是爲峽山之首兩山複出對峙中廣十里塗左有穴謂之僊洞其深五里竇水流出爲澗有嘉魚又曰中峰在巴川縣東南六十里山環二十里如盤民錯居如畫有泉自山注下曰天池 紀勝云縣南十五里有巴嶽山絕頂蟠螭若爐其下有

崑崙洞多蒼玉產仙茅管唐長慶中采樵者服之得仙又產木蓮花高五六尺葉如榎楠花如菡萏出山則不植有玉板泉在山上味甘冽不竭相傳昔人斲井得玉板叩之清越如磬聲然 碑曰云唐永泰二年石刻在巴嶽山之化度院石刻但云永泰二年按永泰齊明帝唐代宗年號齊永泰止五月而唐永泰二年十一月始改大曆故知爲唐無疑 周茂叔天池詩云清和天氣年能幾短葛輕紗近水涯風似相知偏到袖魚如通信不驚槎笑凭山色傾新甕醉傍汀陰數落花嘯傲不妨明月上 一行歸路起柯鴉又



有觀巴嶽木蓮詩云仙姿元是華巔栽不向東林沼  
上開嫩蕊曉隨梅雨放清香時傍竹風來枝懸縞蒂  
垂金彈瓣落蒼苔墜玉杯若使耶溪少年見定拋蘭  
漿到巖隈是時濂溪判合州事來游二作亦皆輕逸  
不沾道學氣可喜也 志云治西百步有望仙樓爲  
唐刺史趙延之建延之刺合州破賊有功後得道仙  
去詳神仙記中按少陵巴山詩云巴山遇中使云自  
峽城來盜賊遂奔突乘輿恐未迴天寒召伯樹地闊  
望仙臺狼狽風塵裏羣臣安在哉又有亡名氏詩云  
西山頂上最高樓登眺能消萬古愁奉使客來纔十

日登仙人去已千秋荒涼巖檜含風雨曲折巴川學  
字流傍晚蹇驢林下過谿雲潭影兩悠悠皆爲延之  
作也

定遠縣

縣南江邊有新明寺古斷碑云此晉之新明縣也嘉  
陵玉溪在其左右中有一岩據大江以西秀拔自雄  
此卽西巖境而漢初縣設焉 碑目云唐趙應龍塚  
在舊漢初縣上有一坊左右畫彩鳳大書雍侯之居  
開元乙卯季秋十九日立又云大圓山有光塵子墨  
蹟云三山相接欲飛騰高下來爲半日登合向中閒



蜀中名勝記 卷之十一  
着夫子大員道士小員僧傍書宋乾道壬辰年相傳  
以爲呂仙作

安居縣

陳子昂詩序入峭峽安居谿伐木谿源幽邃林嶺相  
映有奇致焉其詩曰肅徒歌伐木驚穢漾輕舟靡迤  
隨迴水潺湲沂淺流煙沙分兩岸露島夾雙洲古樹  
連雲密交峰入浪浮巖潭相映媚谿谷屢環周路迥  
光逾逼山深興轉幽麝蹏寒思晚猿鳥暮聲秋誓息  
蘭臺策將從桂樹遊因書謝親愛千歲覓蓬丘此卽  
舊縣之安居壩也 今縣別名瓊江以關箭溪平灘

一帶流入涪江舊傳有瓊花浮水面而出故號爲瓊  
江矣縣理在波羅川東里許蓋有波崙寺云層峰峭  
壁聳插雲霄凭欄而望江山如繡每月白前後皎然  
冰輪若自頂出而殿閣翬飛悠悠松檜閒也三仙石  
連理樹俱在其趾濟勝者所必由矣又東去爲鳳凰  
山昔人于此得遺碑云朝棲梧桐暮宿此山其山頂  
巨石平正謂之鳳凰臺而西南對立者曰龍歸山上  
有龍歸寺山形盤旋如龍亦一方之幽勝也正南則  
龍門山兩峰壁立如門漢隱士蘇汝礪藏書三萬卷  
于此此初學記所載舊屬銅梁今割入當縣碑目云



龍門山東八里有印土院院有將軍祠石刻云故唐將也逃難山中而死葬山陰或曰戰國時人也歲春夏民以車蓋迎其神至水上張帷致饗 志云縣太平里有唐柳玼墓玼在景福間刺渝州遷瀘州道卒葬於安居也玼公綽之後善書初任御史大夫在渝時東川節度使顧彥暉請書德政碑玼曰若以潤筆爲贈卽不敢從命矣其剛正如此

綦江縣

江發源夜郎作蒼帛色故名綦昔南平軍之長官司也志云治南三舍溪關上有雁塔碑曰此地南平軍

舊址南平王墓亦在此關 瀛山在縣境去郡百二十里有四十八面壁立高峻四時青翠望若蓬瀛唐貞觀置瀛山縣於此宋劉望之詩山盤四十八面險雲暗三百六旬秋其上有白雲觀觀前石笋參天有碑名鳥道碑 方輿勝覽云南平軍西北有東溪溪上小市有孝感橋紹興甲戌有里婦從姑過溪姑墜水赴救之亦墜漂至灘下皆不溺

南川縣

陳復亨廳事記云南平州邊夜郎外控諸酋跨漢二郡唐五州之境 寰宇記云武德二年置南州理隆



陽縣取西永隆山爲名先天二年避諱改爲南川貞觀四年置南平州理南平縣八年改爲霸州又云貞觀十一年涪州置隆化縣亦取永隆山先天改爲賓化縣按三地相去密邇俱在渝州南境及涪陵枳縣之舊墟矣通志謂宋初於當縣置南平軍熙甯省入隆化尋復置元併南平軍及隆化入焉

文苑英華李

嶠有勅奉議卽行涪州隆化縣元素履制綰符兩穴游刃三巴賓僚戀仰蠻漢謳吟

寰宇記云南

平西四里有赤水卽丹水也唐置丹溪縣于此丹溪合於棘溪故改南州爲棘州焉棘水流入江津縣南

界所謂棘溪口也今縣西二里有棘水寺 方輿勝覽云棘溪東溪葛溪合流當縣西北故貞觀又置三溪縣焉其所理名爲石城在今縣東甚峻險 僞蜀毛文錫茶譜云南平縣有狼狽山出茶黃黑色渝人重之寰宇記云狼狽鄉人構屋高樹上謂之閣欄不解絲竹惟繫銅鼓祭鬼以祈福一名獾厓在南平軍西 方輿勝覽熊本平木斗夷得地五百里山高谷深乃奏建南平軍謂卽板楯七蠻故地先是劉孝標守南州請置郡縣遠人安之晏殊爲孝標撰墓銘尙在 劉夷叔雲山堂詩山繞郡樓初過雨月臨池樹



晚生煙蒲訟南川驛詩鶯花非漢舊棟宇尙唐餘趙  
彥邁歲熟詩蕞爾會無一掌平由來作郡亦強民雲  
連萬嶂山橫翠川合三溪水繞城又云風俗連巴楚  
封疆接播漆方輿勝覽縣去漆溪三十里爲鹿洞堡  
去播州三百里爲白錦堡 王象之碑目云漆溪寨  
路西心坎厓上有隸書太初二年三月十六日共二  
十餘字文多殘缺不可讀漢質帝時刻也去南平軍  
七十餘里又云漆州堡吹角壩上有古磨厓風雨股  
剝苔蘚侵蝕惟識其一二曰建安其他不可辨漢獻  
帝時刻也又云吹角壩有姜維碑始土人開山得一

穴穴內有碑姜維字猶可辨又云南川鎮下三里厓  
上有石佛像近有碑出於其下司法參軍員外郎置  
司正靳豫撰序云南州城門前石岸盧舍那石像乃  
開元十八年十二月丙戌中大夫使持節南州諸軍  
事守南州刺史上柱國晉昌唐虞景所造又曰白鵠  
寺鐘碑字磨滅垂盡尙餘一二可識曰白鵠寺鐘處  
士彭城劉欣撰 又云羅圍城上有古碑名平眞碑  
未詳按志治境上有此城

長壽縣

華陽國志江州郡樂城縣在州西三百里延熙十七



年省按今縣界有樂磧鎮卽其地寰宇記曰唐武德置樂溫縣秦時枳地也桓元子別置枳縣在巴之北涪之南至後周省入于巴縣焉 樂溫志曰樂溫山下有樂溫灘在縣南四十里元時置涪陵巡檢司因唐縣址也地氣常溫禾稼早熟因之得名志以此山人多耆耆亦名長壽山 圖經云昔徐神翁煉丹於枳有丹厓高二十餘丈下垂瀑布注於江厓下老榕蒼翳弘敞而陰森者清陰洞也洞中多留題剝蝕不可辨有數行適楷稍似涪翁及元許衡偕門人趙進眞來遊題名志云在學宮右側圖經集仙山爲徐神

翁飛昇處在縣之北眞觀搗藥杵臼尙存有臺曰煙霞臺卽此 志又云白虎山亦名鳳山在涪西一里山麓刻讀書處三字旁識云端平二年鶴山赴樂溫爲史子書按眉人史大用讀書于樂溫白虎山作崇德廟碑者也鳳山下有韓村宋開禧中土人韓申之見山坡有綠衣端坐指麾其僕入村酤酒有白驪齧草其旁卽文昌書所謂牧騾化矣圖經曰白虎山石龕篆風月之臺四字甚古其上石厓桃花水出焉有洞古邃幽深銀鴨石笋杳然人境卽桃花洞也 志云不語灘在縣東一里相傳客航過此皆相戒不言



言則難加洵湧又云玉溪里在縣西八里宋賢譙定天發晏淵亞夫所居也譙學于伊川晏學于考亭云輿地碑自古書山去樂溫縣四十里有大曆年石刻云昔人砌山路見石穴中藏蝌蚪書數軸古書之名起于此宋安剛中張桓侯廟記云漢自建安以來皇綱廢弛神鼎震覆姦雄觀釁實生豕心本初孟德之徒磨牙礪吻血視生靈期於吞噬不留遺種玄德忼慨爲國志在援拯一時英豪狗義蜂起相與提挈共成大事諸葛關張實爲之最凜冽威風萬夫之雄荊州之役羣盜鼎來公爲後拒畢力盡死以抗羣

醜奮髯張目橫戈一叱蛇豕異類褫魄逃遯虞淵之日復耀西南繫公之功迄今千歲英靈之氣森聳如在廟食百世在禮固宜樂溫之山下瞰大江公之神爽實茲寓焉自古迄今長載祀典舟行上下與彼土民奔走奉事敢不虔至九穀嘉生連被原隰船楫往返安流無恙陰相之功在國與民天朝累封進爵爲王惟是廟宇興建歲久行廊爛頽往來咨嗟力莫能振郡守李公向者趨朝祇謁祠下再拜祈禱厥應如響至郡未幾首議修繕自捐金帛眾趨成之功費雖多了不病民撤去卑陋增飾輪奐闢展地基比舊加



倍是役也議興於庚午之冬落成於辛未之春焉

蜀中名勝記卷之十八終

蜀中名勝記卷之十九

閩中曹學佺能始著

重慶府三

涪州

華陽國志巴子時雖都江州先王陵墓多在枳又云涪陵郡巴之南鄙從枳南入折丹涪水與楚商於地接司馬錯昔取商於緜此道也漢時恆有都尉守之蜀延熙中車騎鄧芝以江州都督治陽關于此陽關者巴子所置三關之一水經江水東至枳縣西延江水從牂柯郡北流西屈注之又云江水至巴郡涪



陵縣注更始水酈註曰水東逕陽關巴子梁江之兩岸猶有梁處寰宇記云岑彭破公孫述將侯丹於黃石黃石者橫石灘也謂之石梁 水經註曰江水東至梨鄉歷雞鳴峽江之兩岸有枳縣治故華陽國志謂枳縣治涪陵水會庾仲雍謂有別江出武陵者也又曰更始水卽延江枝分之始也延水北入涪陵水王莽更名巴亭張堪爲縣會公孫述來擊于時同心義士選習水者筏渡堪於小別江卽此水也其水北至枳縣入江 方輿勝覽云涪江者自思州之上費溪發源經五十八節名灘方至黔州溉自黔州溉與

施州江會流九十里經彭水武隆二縣凡五百餘里與蜀江會于州之東以其出於黔州又呼黔江亦名內江其水淵澄清澈可鑒毛髮底見苔石魚鰕可數 張祐送李長史歸涪州詩涪江江上客歲晚卻還鄉暮過高唐雨秋經巫峽霜急灘船失次疊嶂樹無行好爲題新什知君思不常戴叔倫新至涪州先寄王員外使君縱詩文教通夷俗均輪問火田江分巴字水樹入夜郎煙毒瘴含秋氣陰崖蔽曙天路難空計日身老不由年將命甯知遠歸心詎可傳星郎復何意出守五溪邊陸游詩古壘西偏曉繫舟倚闌搔



首思悠悠欲營丹竈竟無地不見荔枝空遠遊官道  
近江多亂石人家避水半危樓使君不用勤留客瘴  
雨蠻煙我欲愁 方輿云黔江東岸有龜山州治其  
上元和志舊州在岷江南今州在涪江西蜀漢涪陵  
太守龐肱有惠政輿地碑目淳熙中左綿任子宜過  
涪陵於民家見漢隸石闕上書漢涪陵太守龐肱關  
闕製如碑 東渡高峰之上與州治相對爲石甕磧  
方輿勝覽云太守吳侯嘗遊石甕磧遇一女繖蓋步  
磧上曰吾父居此瀕去解一玉環付廂吏爲我謝使  
君異日當歷顯任子孫復守此州言訖不見按志吳

光輔爲涪守後三十年其孫仲復又守是邦今吳公  
溪吳公山所爲得名也 舊經云吳君山一名鐵櫃  
山橫互江北與涪陵縣相望雄壓眾山俯臨長江屹  
立如櫃相傳武侯屯兵于此舊城猶存 勝覽云鐵  
櫃之南爲北岩王真人修煉處也紹聖丁丑程伊川  
謫涪郎普淨院闢堂傳易再閱歲爲元符庚辰乃徙  
夷陵 碑目云涪陵江北普淨院記治平閒校書郎  
傅耆撰北岩書院記嘉定丁丑簡池劉光祖撰普淨  
院鉤深堂榜別駕黃庭堅書又有淳祐辛亥三月旣  
望古口劉濟川三山林元成成都杜庭燮三廬何清題



名又有汴陽吳克舒以紹興癸未書云日舉家來遊  
阱掾侍行諸刻 輿地紀勝云開寶四年黔南上言  
江心石魚見上有古記云廣德元年二月大江水退  
石魚見部民相傳豐稔之兆按其處在近州鑑湖中  
央石上刻雙魚一銜蓂草一銜蓮花各三十六鱗旁  
有石秤石斗或十年或三五年一出唐大順元年鐫  
詩甚多 方輿勝覽州西一里白鶴灘爾朱真人沖  
舉之處志云爾朱旣浮江而下漁人有白石者舉網  
得之擊磬方醒遂於涪西灘前修煉後乘白鶴仙去  
因以名灘 又云爾朱先生種松山在州東二里種

時松影映石石皆有松紋至今呼松屏石採者禱於  
先生乃得佳不煩人力自然成文 華陽國志延熙  
二年馬忠定越嶲置赤甲軍常取涪陵之民蜀丞相  
諸葛亮亦發勁卒三千人爲連弩士按志有赤甲戍  
與黃草峽相近在李渡之上藺市之下杜甫詩云黃  
草峽西船不歸赤甲山下行人稀卽此地也 碑目  
云許雄山有古廣漢縣令神道碑俗呼爲誓虎碑碑  
偶仆遂有虎入城縣官設祭復豎碑虎害乃止按山  
在州西南七里山之東有馬援壩 志云馬援壩在  
治南四里伏波祠在治東十里相傳將軍征武陵蠻



蜀中名勝記 卷之十九  
駐兵之處寰宇記涪陵江中有銅柱灘最峻急昔人  
維舟于此見水底有銅柱云 灘之東爲錦繡洲九  
域志云此洲人業織錦罽 宋翰詩錦繡洲猶在熊  
羆夢已無文風齊兩蜀仙洞接三都白石從天設青  
厓見地圖荔枝妃子國不復曩時輸 方輿勝覽云  
城西十五里有妃子園其地多荔枝昔楊妃所嗜當  
時以馬遞馳載七日七夜至京人馬多斃於路百姓  
苦之故杜牧之過華清宮詩云長安迴望繡成堆山  
頂千門次第開一騎紅塵妃子笑無人知道荔枝來  
華陽國志涪陵郡有丹興縣以山出名丹也蜀時省

李特傳范長生一名延久又名九重涪陵丹興人按  
史記巴寡婦清之先得丹穴而擅其利家富不貲清  
能守其業用財自衛秦皇帝以爲貞婦而爲築女清  
臺括地志云女清臺山在永安城東北七十里爲涪  
陵南平二郡界

### 武隆縣

漢涪陵枳二縣地唐武德元年分涪陵縣立以邑界  
武隆山爲名本志云枳縣故址在治東上流二十里  
李膺益州記云內江水自萬甯西北二百八十里至  
關頭灘灘長百步懸崖倒水舟楫莫通寰宇記云內



江一名涪陵江一名巴江在縣南屈曲北流又云蜀江門灘在縣前巴江水中 志云縣西一里古渡頭有斷石中白痕如劍光芒燭天名爲天劍又云南二十里有信水在峽口其泉如沸水與江等日有三潮每至則高丈餘又云龍寶潭在縣東北七十里古箐淒其人鳥兩絕杖簾而入幽徑可十里忽平沙廣野曲壑清泉別一世界 四夷考云武隆之地東隣黔楚西接牂柯北枕巴江南通貴筑又三面界土司爲西陽之咽喉石砧之頂臂至若眞州則撲胸之患矣所謂難先全蜀險阨諸蠻者也

彭水縣

史記秦司馬錯取楚商於之地爲黔中郡卽此寰宇記云卽劉璋之漢葭縣 隋開皇十三年蠻帥內屬故於此地設彭水屬黔州亦州之所理也本志云舊理在壺頭山之麓今移於紹慶府基按宋史太平興國八年黔州摩圍山慶雲出通判黃仲震圖頌以獻中興小曆理宗始追封爲紹慶府焉 權載之黔州觀察使廳記云黔中爲楚西南徼道在漢爲武陵莊躋循江以略地唐蒙浮船以制越舊經地近荆楚候如巴蜀五溪襟東蠻蠻聚落陰雨多晦草木少凋寰



宇記云五溪謂酉辰巫武沅等五溪古老相傳楚子城巴巴子兄弟五人流入五溪各爲一溪之長一說五溪蠻皆盤瓠子孫自爲統長故有五溪之號古謂之蠻蠻聚落也三國志劉先主于五溪蠻之地置黔安郡卽此地樂史以爲郡後周設誤矣 劉長卿送任侍郎黔中充判官詩不識黔中路今看遣使臣猿隨萬里客鳥似五溪人地遠官無法山深俗易淳須令荒徼外亦解懼埋輪司空曙送龐判官赴黔中詩云天遠風雲異西南見一方亂山來蜀道諸水出辰陽堆案青油暮看碁畫角長論文誰可製記室有何

郎李嘉祐送上官侍御赴黔中詩莫向黔中路令人到欲迷水聲巫峽裏山色夜郎西樹隔朝雲合猿窺曉日啼南方饒翠羽知爾飲清溪許棠寄黔南李校書詩從戎巫峽外吟興更應多郡響蠻江漲山昏蜀雨過公遜饒越味俗土尙巴歌中夜懷吳夢知經灑瀕波顧非熊送皇甫司錄赴黔南幕詩黔南從事客祿利向來饒官受外臺屈家移一舸遙夜猿聲不斷寒木葉微凋別遠因多感新郎倍寂寥杜荀鶴送人尉黔中詩盤山行幾驛水路復通巴峽漲三川雪園開四季花公庭飛白鳥官俸請丹砂知尉黔中後高



吟采物華許琳黔中書事詩巴蜀水南偏山窮塞壘  
寬歲時將近臘草樹未知寒獨狖啼朝雨羣牛向暮  
灘更聞蠻俗近烽火不艱難竇羣黔中書懷詩萬事  
非京國千山擁麗譙佩刀看日曬賜馬傍江調言語  
多重譯壺觴每獨謠沿流如着翅不敢問歸橈李頻  
黔中酬同院韋判官詩平生同所爲相遇偶然遲各  
着青袍後無歸白社期江流來絕域府地管諸夷聖  
代都無事從公且賦詩 碑目云漢故孝廉柳莊敏  
碑在州廨內字迹銷譌唐黔南節度使趙國珍德政  
碑上元二年立在州南隔江崔甯神道碑集古錄以

爲長慶二年立在州治山谷刀筆云宋左藏庫副使  
東南第八將秦世章自長沙買石摹僧寶月古法帖  
十卷載回黔安壁之紹聖院庭堅爲之跋按世章秦  
子明涪州人也丹鉛錄謂寶月帖又在隋開皇帖南  
唐昇元帖之前比之金薄匱紙銀錠椽痕者優劣當  
懸矣 紀勝云魯直謫居有涪翁晚策杖至此觀江  
漲雨餘天欲涼十五字墨蹟在州之嘉禾堂又黔中  
與人帖云庭堅頓首竊觀鎮靜足以安夷僚清節足  
以服吏民郡閣宴閑時與僚佐歌舞以謝江山當亦  
無不樂時別後未嘗不思英對也齋中小宴歌舞中



更得新進否此邦樂籍似皆勝渝瀘微有成都之風也 本志載宋冉木作黔州倅衙月山岩銘云黔號古郡地居極邊倅治倚山其山刺天有日月巖古老相傳視事累月徧求茫然偶濬溝渠巨石中填深掘視之厥狀巘岏中竇一穴透明而圓皎如秋月翳絕雲煙旁輔三隙如星之聯技拭細觀古識存焉爰命僕夫挽置座前負以層石映以灣泉日對其側卷舒簡編凡物遭遇皆有因緣高岸深谷知幾變遷惟我月巖存千萬年又飛來峰銘云黔山角逐雲空相摩疊石其閒如戟如戈否則躡伏橫立攢阿千狀萬怪

知名幾何惟飛來峰涪翁相遭有筆如椽三字袞袞一經品題聲價倍高譬如人乎何地無材不遇知音均混草萊有力吹噓清冀路開一飛冲天迥絕塵埃噫歎茲石千古體體四維整植如出剪裁日炙雨澆蒼然生苔不動惟汝何從飛來因涪翁重汝何能哉志云綠陰軒在治南一里石軒下平曠可容十數人黃魯直過此手書綠陰軒三字鐫于石壁至元年紹慶總管向午鳳重修有卧佛巖與綠陰軒相近巖石欹懸生一竅甚圓仰窺之又生一竅其中虛明有橫石一塊眉目宛然如來佛曲肱枕卧時也 紀勝



蜀中名勝記 卷之十九  
云西南過江五里有摩圍山夷獠呼天爲圍以其高  
摩於天也道家謂之洞天福地昔有樵者攀緣入洞  
見二老圍碁其中回復尋之了不可得魯直安置黔  
中寓開元寺號摩圍老人有石泉在山頂山勢壁立  
泉從石竇中流出寺僧以甕接之爲朝夕清供碑目  
載摩圍山唐人石刻云巴黔路途闊遠亦無館舍凡  
至宿泊多倚溪巖就水造冷鑽木出火山谷集云丙  
子仲秋黔守席上客有舉杜少陵中秋詩曰今夜鄜  
州月閨中只獨看遙憐小兒女未解憶長安因戲作  
詞云舉頭無語家在月明生處住擬上摩圍最上峰

頭試望之偏憐鐘秀苦淡同甘誰更有想見牽衣月  
到愁邊總未知又丙子仲秋奉陪黔陽曹使君伯達  
翫月作減字木蘭花兼簡施州張使君仲謀云中秋  
多雨常是罇罍狼籍去今夜雲開須道如娥得得來  
不知雲外還有清光同此會笛在層樓聲徹摩圍頂  
上頭 九州要記云黔州有彭水在信甯縣卽古之  
黔中地志云唐長孫無忌墓在信甯西岸岐山之麓  
按史無忌洛陽人累官太子少傅同中書門下三品  
高宗時諫立武后許敬宗誣奏無忌反削其官爵謫  
黔州安置沒葬是鄉居人歲以三月三日致祭云



黔江縣

隋之石城縣也志云城東二十五里爲舊縣 又云歌羅驛在治東百九十里黃魯直竹枝歌七首題于驛壁其一云浮雲一百八盤縈落日四十九渡明鬼門關外莫言遠四海一家皆弟兄志云四十八渡水在治西二十里發源柵山溪水折流四十八灣夾于兩岸之間春月百花飄落隨水可愛又云治西五十里峭壁中有木櫃人迹不到 櫃子崖在四十八渡之中李頻泛黔江詩野梅將雪競江月與沙寒卽此水也

忠州

譙周三巴記曰臨江縣後漢初平六年立在永甯郡東四百里臨江南古城 水經曰江水又東逕臨江縣南註謂王莽之鹽江縣也郡國志云梁于此立臨江郡隋置臨州貞觀始改爲忠州忠之名以巴蔓子或云嚴顏按華陽國志周之季世巴國有亂將軍蔓子請師於楚許以三城楚王救巴巴國旣甯楚使請城蔓子曰藉楚之靈克弭禍難誠許楚王城將吾頭往謝之城不可得也乃自刎以頭授楚使楚王歎曰使吾得臣若巴蔓子用城何爲乃以上卿禮葬其頭



巴國葬其身亦以上卿禮今治西北一里有蔓子冢  
三國志劉璋使嚴顏守巴郡爲張飛所擒欲降之  
顏曰有斬頭將軍無降將軍飛怒命斬之顏從容曰  
斫頭便斫頭何必怒也今臨江縣西南二十里有嚴  
太守碑及祠蘇軾詩云先主反劉璋兵意頗不義孔  
明古豪傑何以爲此事劉璋固庸主誰爲死不二嚴  
子獨何賢談笑傲礎几國亡君已執嗟子死誰爲何  
人刻山石使我空涕淚蘇轍詩云古碑殘缺不可讀  
遠人愛惜未思磨相傳昔者嚴太守刻石千歲字已  
譌嚴顏平生吾不記獨憶城破節最高被擒不辱古

亦有吾愛善折張飛豪軍中生死何足怪乘勝使氣  
可若何斫頭徐死子無怒我豈畏死如兒曹匹夫受  
戮或不避所重壯氣吞黃河臨危閒暇有如此覽碑  
慷慨思橫戈自註云碑在忠州本志州西五十里江  
中高阜名塘土洲有嚴顏墓碑及祠 九域志云臨  
江郡有古屈原碑王象之碑目亦引之東坡謂屈原  
古塔在忠忠不當有此意者後人追思爲之其詩曰  
楚人悲屈原千歲意未歇精魂飄何處父老空哽咽  
至今滄江上投飯救饑渴遺風成競渡猿叫楚山裂  
屈原古壯士就死意甚烈世俗安得知眷眷不忍決



南賓舊屬楚山上有遺塔陸游詩云我遊南賓春暮  
時蜀船曾繫掛猿枝雲迷江岸屈原塔花落空山夏  
禹祠塔在江之南岸 紹聖四年王闢之知忠州建  
四賢閣於治後四賢者故相司徒鄭州刺史南華劉  
晏士安故相贈兵部尚書嘉興陸贄敬輿中書侍郎  
平章事贈司徒安邑李吉甫宏憲刑部尚書致仕贈  
右僕射下邳白居易樂天皆有像設今移在學宮  
輿地碑目云忠州學宮有漢江原君石闕闕上延熹  
等二十七字可捐自州西十五里移來者又有晉王  
右軍半月橋帖經涪翁題跋 又云州治有漢建初

中修道碑字已漫滅餘建初等十二字可辨治內議  
道堂有唐率更柘漿帖碑太守王聖涂購自臨江農  
民瞿氏命男宗摹刻紹聖四年七月二十四日後有  
山谷題跋 又云州儀門下有漢延熹嚴孝子碑按  
華陽國志元初中貢孝子嚴永卽此碑矣字已漫蝕  
餘延熹二年等八十餘字自城西二十里移來者  
文苑英華唐蘇頲有授忠州刺史上騎都尉王守廉  
制陳子昂有忠州江亭喜遇吳參軍見牛司倉序略  
云江亭迴瞰羅雜樹于階基山榭遙臨列羣峰于戶  
牖丹藤綠篠俯映長筵翠渚洪瀾交流合坐 杜



甫宴忠州使君姪宅詩出守吾家姪殊方此日歡自  
須遊阮舍不是怕胡灘樂取長歌送杯饒旅思寬昔  
曾如意舞牽強爲看李端送濮陽錄事赴忠州詩  
成名不逐雙旌遠空印還爲一郡雄赤葉黃花隨野  
岸青山白水映江楓巴人夜語孤舟裏越鳥春啼萬  
壑中聞說古書多未校肯令才子久西東白居易郡  
中春讌因贈諸客詩僕本儒家子待詔金馬門塵泰  
親近地孤負聖明恩一旦奉優詔萬里收遠人可憐  
烏夷帥自稱爲使君身騎牂柯馬口食巴江鱗暗淡  
緋衫故爛斑白髮新是時歲一月玉曆布春分頌條

足皇澤命宴及良辰冉冉趨府吏蚩蚩聚州民有如  
蟄蟲鳥亦應天地春薰草席鋪座藤枝酒注樽中庭  
無平地高下隨所陳蠻鼓聲坎坎巴女舞蹲蹲使君  
居上頭掩口語眾賓勿笑風俗陋勿欺官府貧蜂巢  
與蟻穴隨分有君臣 樂天刺史茲邦風流暇豫日  
事遊賞其踪跡最著者有東樓荔枝樓鳴玉溪龍昌  
寺巴子臺東坡東澗諸勝黃魯直爲王聖涂作記云  
樂天東樓以燕賓佐西樓以瞰鳴玉溪登龍昌上寺  
以望江南諸山張樂巴子臺以會竹枝歌女東坡種  
花東澗種柳皆相傳識其舊處焉 東樓卽城東樓



也白公東樓詩云山東邑居窄峽牽氣候偏林巒少  
平地霧雨多陰天隱隱煮鹽火漠漠燒畚煙賴此東  
樓夕風月時脩然憑軒望所思目斷心悵悵又東樓  
竹詩云瀟灑城東樓遶樓多修竹森然一萬竿白粉  
封青玉捲簾睡初覺欹枕看未足影轉色入樓牀席  
生浮綠空城絕賓客向夕彌幽獨樓上夜不歸此君  
留我宿 荔枝樓在治西南隅卽西樓也公旣作荔  
枝圖以寄親友又建樓以賞之其詩曰鄉路音信斷  
山城日月遲欲知州遠近階前摘荔枝又西樓詩云  
悄悄復悄悄城隅隱林梢山郭燈火稀峽天星漢渺

年光東流水生計南枝鳥月沒江沈沈西樓殊未曉  
寰宇記云鳴玉溪在州西十里有懸岩瀑布高  
五十餘丈潭洞幽邃古木蒼然前刺史房式嘉其幽  
絕特置蘭若凡有五橋以渡長慶集云鳴玉溪上木  
蓮穠茂元和十四年夏命道士母丘元志寫之本志  
云溪在治西二里發源西厓水聲如珮玉其旁有古  
刻亦名西溪又云西北五里有木蓮洞宋錢求之詩  
云鳴玉溪邊堪寓目木蓮洞下更關情忠州好景無  
人說祇得孤城小市名今治內有木蓮樓相沿其名  
非故處也 龍昌有上寺下寺俱唐建在西山頂者



爲上寺卽巴臺寺也與翠屏山相對故云可以望江  
南志謂之巴子臺巴子所築也唐宋詩刻存焉下寺  
卽治平寺寰宇記曰龍昌寺在臨江縣東今爲治平  
寺白公嘗於寺旁植柳柳盛則寺興柳衰則寺廢寺  
僧愛此柳比之甘棠 白傳登城東古臺詩迢迢東  
郊上有土青崔嵬不知何代物疑是巴王臺巴歌久  
無聲巴宮沒黃埃志云巴王廟在州東一里神卽蔓  
子將軍也歲三月七日太守以豕帛致祭先期土人  
具千鈞蠟祠之宋爲永順祠今爲忠貞祠 王象之  
碑目云漢丁房雙石闕在巴王廟前按左闕高可二

丈覆以飛甍層觀最上琢雙扉一美人現半身倚立  
中層琢車馬人物旁刻文螭糾蟠長可三四尺金石  
古文云此漢畫之始也正面漢隸十行行三十字強  
半剝落惟漢都尉丁房五字相聯可讀它無恙者尙  
三十二字闕陰鐫云紹聖丁丑五月戊午知忠州軍  
事齊國王闢之軍事推官荆南李鑑兵馬監押維  
陽田缺巡檢安化楊中孝監稅濟南蓋儀逸錄事高  
陽張復臨江縣令竟陵張微司戶參軍陽安文同司  
理參軍雲安常彥臨江縣主簿東武缺同遊永順王  
祠坐東軒面巴峽臨岷江望東溪之龍潭崇山峻嶺



激湍清流真山陰之蘭亭也於是賦詩酌酒極一時  
適將歸共觀石闕之上讀漢都尉丁房碑欲重加刊  
刻而文字磨滅竟不可辨相與嘆息而去右邊闕就  
圯近日爲有司者新之了非故物 巴臺下江中有  
石圓光如鏡旁有五石筍簇之呼爲仙人照鏡臺  
勝覽云東坡在南賓郡圃有亭名東亭白公詩綠樹  
爲閑客紅蕉當美人又何處慙慙重回首東坡桃李  
種新成又最憶東坡紅爛熳野桃山杏水林檎蘇子  
瞻東坡之號實始於此其詩云平生自覺出處老大  
粗似樂天非東坡之名偶企同也 志云東澗在治

西開元寺側亦樂天時鑿公有東澗種柳詩云野性  
愛栽植植柳水中坻三年未離郡可以見依依 水  
經曰江水又逕虎鬚灘灘水廣大夏斷行旅今州西  
二里有石梁三十餘丈橫截江中俗呼倒鬚灘卽其  
處 輿地碑目唐土洲有貞元十七年段文昌撰耆  
老思舊碑有唐刺史房公式善狀碑志云唐土洲在  
治西五十里有景德寺善狀碑立在普甯院中 水  
經曰江水又東注黃華水口左逕石城南志云卽黃  
華洲在東五十里江浦週迴可二十里碑目云有宋  
忠州貢院碑參軍安元白立金魚堡碑陞忠州爲咸



涪府碑俱在此洲上咸涪碑詔文勅門下皇天畀付  
有家敢怠繼承之敬乾元首出庶物聿懷潛躍之初  
念聖考之貽謀擇价藩而錫履嚴陵龍水之鎮受節  
齋壇永嘉忠南之封分茅主社瞻言屏翰之重允協  
謳歌之歸漢輿地之上圖若規先憲周舊邦之新命  
竝錫府名以壯萬年之觀亦尙一人之慶其改陞溫  
州爲瑞安府嚴州爲建德府宣州爲慶遠府忠州爲  
咸涪府咸涪元年八月二十九日午時急速按寰宇  
記石城在臨江縣東百里岷江之北岸李雄之亂巴  
西郡託理于此城四面懸絕亦謂之巴子城 華

陽記曰臨江縣有鹽官在鹽涂二溪一郡所仰按涂  
溪在州東八十里發源蟠龍洞來經涂井井神爲漢  
楊伯起井廟碑云神嘗刺史荊州遡江至此憇于南  
城寺謂人曰江北二三里閒安得有寶氣耶至蟠龍  
洞見周柱下史丹爐曰此地有龍無虎宜其丹不就  
也至涂山見白鹿飲泉曰寶氣在此矣土人從所指  
處鑿磬石而得鹽泉廟在治東一里志云東南八十  
里方斗山以形名也山有龍洞其神號方斗龍王所  
謂涂山與蟠龍洞者此是又云東二十里香爐碓北  
有石碑云處士楊佐墓漢楊伯起之裔孫 南山卽



翠屏也在對岸二里山中有禹廟陸宣公墓玉虛觀  
朝真洞望夫臺仙履迹諸勝白傳作樓以望之其詩  
云江上新樓名四望東南西北水茫茫又有望南山  
寄行簡詩臨江一嶂白雲閒紅綠層層錦繡斑不作  
巴南天外意何如昭應望驪山 輿地碑曰禹廟有  
唐碑字畫漫滅不可讀宋碑乃張俞作杜甫詩云禹  
廟空山裏秋風落日斜荒庭垂橘柚古屋畫龍蛇雲  
氣噓青壁江聲走白沙早知乘四載疏鑿控三巴度  
禹廟緣山行可里許爲玉虛觀輿地碑曰云玉虛觀  
有唐人修建碑四方輿勝覽云玉虛觀南三十步有

陸宣公墓舊經陸宣公贊藁葬于此或曰宣公已歸  
葬樵李忠南特虛塚耳然子美已歸葬偃師而未陽  
之墓自若太白已移殯青山而采石之塚猶在則敬  
輿此墓宜封植之矣玉虛亦名紫極觀 通志云忠  
州南十里有望夫臺未詳其事按東坡忠州望夫臺  
詩云山頭孤石遠亭亭江轉船回似石屏可憐千古  
長如昨船去船來自不停浩浩長江赴滄海紛紛過  
客似浮萍誰能坐待山月出照見寒影高伶俜 本  
志仙履跡石在治北八十里相傳昔有真人立此飛  
昇今足跡尙存宋秦東詩仙人雙赤腳踏石如踏泥



泥痕尙可沒石痕不可迷 杜甫嘗居龍興寺有題  
院壁詩云忠州三峽內井邑聚雲根小市常爭米孤  
城早閉門空看過客淚莫覓主人恩淹泊仍愁虎深  
居賴獨園陸游龍興寺弔少陵寓居詩中原草草失  
承平戍火胡塵到兩京扈蹕老臣身萬里天寒來此  
聽江聲註云寺門外江聲甚壯在州北八十里又二  
十里有拔山寺與龍興寺俱漢永平閒建宋馮時行  
寶華寺詩宿雨初收草木濃羣鴉飛去法堂空長廊  
無事僧歸晚盡日門前只看松卽漢之普明寺也已  
上三寺志云在州北九十里 志云東北三十里大

成寺漢初平建西北四十里寶珠寺晉永和建西北  
百里雙龍寺唐貞元建張詠雙龍寺詩未踏陽關已  
見山木鯨時吼翠微閒老僧隨隊看雲起居士忘緣  
共鶴閒入眼煙光依砌濕倚空霧氣遶山環三朝寶  
訓神明護大讀經章祝玉顏

酆都縣

水經曰江水又逕東望峽東歷平都註謂峽對豐民  
洲舊巴子別都也華陽國志巴子雖都江州或治平  
都卽此續漢書永元二年分枳置平都取界內平都  
山爲名 方輿勝覽云自酆都縣東行二里許始登



山石徑縈迴可一二里平瑩如掃林木還茂夾逕翠  
栢黃葛殆萬株有數十株是千年物此卽平都山也  
酈道元曰平都有天師治兼建佛寺甚清靈道書  
號爲平都福地輿地紀勝云仙都觀在平都山唐建  
宋改景德又名白鶴觀有陰長生詩天成四年書也  
通攷云陰真人祠刻詩三章乃貞元中刺史李貽孫  
書元豐四年轉運判官許安世過祠下闕石定爲陰  
仙之作乃屬知夔州吳師孟書石送置觀中許見神  
仙記 百川學海云治平末蘇東坡泝峽泊舟仙都  
山下道士持陰長生石本金丹訣就質眞贗東坡答

曰不知也然士大夫過此必以請久久自有知之者  
按古今詩謠云蜀道觀中渫井得一碑其文曰有物  
有物可大可久採乎蠶食之前用乎火化之後成湯  
自上而臨下夸父虛中而見受氣應朝光功參夜漏  
白英聚而雪慚黃酥凝而金醜轉制不已神趨鬼驟  
金歟玉歟天年上壽無著於文訣之在口此卽陰仙  
所著丹訣也 勝覽云陰長生以延光元年於平都  
山白日昇天山頂五雲洞中嘗有雲氣從丹井中出  
洞有五雲樓壁上瑤池樂部四字段文昌書 輿地  
碑目云仙都觀有二仙公碑李虔撰二仙銘薛湜撰



俱景雲二年立陰真人景堂碑王真人碑俱李吉甫  
撰貞元年立其石瑩潤而白號爲玉石碑又有商比  
干銅盤銘開元間掘自偃師縣翻刻于此文曰右林  
左泉後岡前道萬世之銘茲焉是寶又有中和元年  
忠州刺史陳旻三官碑丞相段文昌修觀碑段少監  
修齋記天尊石像記老君石像記張大理詩杜光庭  
石函記按今皆不存 志云總真羣仙之府道山洞  
天等刻或隸篆或眞行大徑尺呂純陽書見存純陽  
登平都有訪仙詩云孟蘭清曉過平都天下名山總  
不如兩口單行誰解識王陰空使馬蹄虛又云一鳴

白鳥出青城再謁王陰二友人口口惟言三島樂擡  
眸已過洞庭春宋蘇軾詩足躡平都古洞天此身不  
覺到雲閒擡眸四顧乾坤闊日月星辰任我攀又平  
都天下古名山自信山中歲月閑午夢任隨鳩喚覺  
早朝又聽鹿催班蘇轍詩山前江水流浩浩山上蒼  
蒼松栢老舟中去客日紛紛古今換易如秋草空山  
樓觀何崢嶸真人王遠陰長生飛符御氣朝百靈悟  
道不復誦黃庭龍車虎駕下來迎去如旋風轉太清  
真人厭世不回顧世閒生死如朝暮學仙度世豈無  
人殮霞絕粒常辛苦安得獨從逍遙君冷然乘風駕



浮雲超世無有我獨行范成大詩云神仙得者王方  
平誰其繼之陰長生飄然空飛五雲輶上賓寥陽留  
玉京石爐丹氣常夜明麗光萬栢森千齡峽山偏仄  
岷江榮洞宮福地古所銘云有北陰神帝庭太陰黑  
簿囚鬼靈自從仙都啟巖局高霞流電飛伏精暉景  
下墮爍九冰塞絕苦道升無形至今臺殿棲岑嶰隋  
圻唐堊留丹青十仙怪奇溪如清瑤池仙仗紛娉婷  
琅瑯赴節鏘欲鳴我來秋暑如炊蒸汗流吁氣扶枯  
藤摩挲眾蹟不暇評聊記梗槩知吾曾 段文昌修  
平都觀記云平都山最高頂卽漢時王陰二真人蟬

蛻之所也峭壁千仞下臨湍波老栢萬株上插峰頂  
靈花綵羽皆非圖志中所載者昏旦萬狀信非人境  
貞元十五余西遊岷蜀停舟江岸振衣虔潔詣諸  
洞所石巖靈竇蒼然相次苔龕古書依稀可辨時與  
道侶數人坐於下須臾天籟不起萬竅風息山光耀  
於耳目煙霞拂於襟袖相顧神竦若在紫府玄圃矣  
牽於行役不得淹久瞻眺惆悵書名而去邇來已三  
十四年太和庚戌歲自淮南移鎮荆門有客由峽中  
來者皆言當時題記文字猶在觀宇歲久臺殿荒毀  
不三數年必盡摧沒於巖壑矣乃捨一月秩俸俾令



修葺子來同力浹旬報就去年冬十一月詔命換麾  
幢再領全蜀沂三峽歷舊遊依然景物重喜登覽聞  
泉聲而緩步愛松色而難別遂命筆硯志於巖谷時  
太和七年正月五日 道經云老子騎青牛度函谷  
將息駕于平都今縣二里有青牛山在平都之左  
方輿勝覽云景德觀前鹿麂時出沒林閒與人狎志  
云自平都西去一里林樹叢密者白鹿山也霏雪錄  
云蘇老泉將遊仙都觀知縣李長官云故知君之將  
至也問何以知之曰此山巨鹿鳴輒有客至屢驗輒  
未一失老泉亦嘗爲人言之東坡白鹿山詩云日月

何促促塵世苦拘束仙子去無踪故山遺白鹿仙人  
已去鹿無家孤悽悵望層城霞至今聞有遊仙客夜  
來江浦叫平沙長松千樹聲蕭瑟仙客去人無咫尺  
夜鳴白鹿安在哉滿山秋草無踪跡山之翠微有玉  
鳴泉響作琴音清澄玉色其麓有流杯溪溪凡七出  
相傳平都之仙常燕集于此 華陽國志巴子又立  
市於龜亭北岸今新市里是水經注曰平都縣有  
市肆四日一會東坡詩我生飄蕩去何求再過龜城  
歲五周身行萬里半天下僧卧一菴初白頭題云過  
石龜山作也舊志石龜山在縣東五十里其下有村



墟 志云縣在豐民洲登平都山望岷江西來繞之而去其支流派別名爲溪者可得而數焉根溪在治東山上有魏國夫人墓未詳年代葫蘆溪在西南遂窈莫測蛟龍是宅青螺綠髻上下相映志謂之月鏡潭也碑溪以古碑名不知何代物去縣稍遠望途溪在古南賓縣地今爲南賓里舊屬忠州鄰石碛司志又云龍渠縣今名縣壩屬散毛宣撫司縣有引藤山出藤大如指可以吸酒白樂天詩閑拈蕉葉題詩句悶折藤枝引酒嘗亦近南賓界 愚按豐民洲在平都山下隋兩取之以名縣自豐旁加邑而羅豐地

府之說始行今引真誥廣記二文附此真誥曰羅豐山在北方癸地註此癸地未必以六合言當是於中國指向正在幽州遼東之北北海之中去岸不知幾千萬里又曰六天宮是鬼神六天之治也洞中六天宮亦同名相像如一世有知酆都六天宮門名則百鬼不敢爲害陶弘景曰此應是北酆鬼王決數罪人住處其神卽經所稱閻羅王矣太平廣記曰東都豐都市在長壽寺之東北初築市垣掘得古塚土藏無磚甃棺木陳朽觸之便散屍上著平上幘朱衣得銘曰筮道居朝龜言近市五百年閒于斯見矣當時達



者參驗是魏黃初二年所葬也然范成大詩云有北  
陰神帝庭太陰黑簿囚鬼靈則鄴都之說亦不起于  
近代

墊江縣

唐通典曰魏恭帝始置忠州墊江縣後周改名魏安  
隋開皇十八年復爲墊江蔡松年南史補曰漢之墊  
江今之合州也合州置自西魏及隋煬帝改合州爲  
涪陵郡於是移墊江之名于桂溪縣桂溪溪旁多桂  
樹也縣以樹名寰宇記曰桂溪縣有清水有容水在  
桂溪南三里清水唐縣名猶開州之清濁二水矣縣

又有鹽溪今治北小溪上有古碑乃宋淳熙中物  
孟康註地理志曰墊江之墊音重疊之疊晉太康地  
記曰墊江因李雄之亂移置于陽關陽關未詳疑卽  
陽關爲三關之一 碑目會仙洞榜在治北四十里  
之鳳凰山李太白書羅王洞榜在治北五十里之西  
山李唐勅賜也按西山磐石上有巨人迹或羅王榜  
之始名 志云東北二十里有古寺曰秋月禪關唐  
馬祖修淨之所卽峰頂山也又二十里有古洞飛湍  
喧豗如雷聲聞十餘里久晴聞之則雨久雨聞之則  
晴 段氏遊蜀記曰忠州墊江縣以蘇薰爲席絲爲



經其色深碧 渝志云明玉珍僭號以墊江為雞鵝食邑亦猶巴子以東突碇為畜牧沮矣

蜀中名勝記卷之十九終

蜀中名勝記卷之二十

閩中曹學佺能始著

遵義道

遵義府 遵義縣附郭

漢書唐蒙上書說武帝曰竊聞夜郎國所有精兵可得十萬浮船牂柯出其不意此制越一奇也上乃拜蒙為中郎將從巴笮關入見夜郎侯厚賜諭以威德約為置吏夜郎旁小邑皆貪漢繒帛以為漢道險終不能有也迺且聽蒙約還報乃以為犍為郡發巴蜀卒治道自犍道指牂柯江司馬相如又往諭意皆不



聽命數反叛及南越反上使馳義侯同健爲發南夷  
兵且蘭君乃反殺使者會越已破引兵誅且蘭遂平  
南夷 唐詩云天下山河之象在乎兩戒南戒自岷  
山迤邐及北地上郡西南至巴蜀漢中東及牂柯今  
遵義之區雖四塞爲固而襟帶之脈則牂柯江水矣  
郡志云碧雲峯在治西四峯並峙中央迥出青碧  
如雲按神君張亞播州玉皇碑云城西碧雲峯下公  
府西北隅爨行清勝隱然神仙窟宅 志又云城外  
桃源洞石乳天垂見者眩目沈德元詩云亭跨桃源  
石溪山眞美哉笑同今日上醉去幾時來環野誰堪

據寸心當自裁丈人千古意倚望一銜杯後人因立  
美哉亭 四爨傳宋淳熙中遷遵義軍於穆家川志  
云穆家川源出龍巖山流經湘山一名湘川李白詩  
云洛陽才子謫湘川元禮同舟月下仙記得長安還  
一笑不知何處是西天白詩又云石笋如掉筆懸于  
山之顛誰謂不平者與之書青天志云金樓山關石  
笋參天是白題詩處也 志云海龍園爲楊酋穴壘  
在治北三十里四面斗絕後有側徑畧一線今居人  
尙不知通於何所故老相傳昔白龍太子據此今爲  
白龍寺又城外福光寺有銅佛像初人見之荒莽中



欲取者數風雷輒作不敢近有異僧率土人齋戒乃得今在寺中又有龍山鐘黑達樹皆異物也播平鐘爲水西持去樹猶存 志又云城北門有廖孝廉故宅城東郭有二冉故宅西北有苗齋郎故宅按齋郎太廟執事之官也人代未詳寰宇記謂齋郎水源出蒿芟里楚米陂經小溪里入瀘江本此二冉宋末播州名士冉璉冉璞也有文武才前後辟召皆不赴余玠安撫四川築招賢館兄弟往謁玠與分庭抗禮久無所試使人窺之惟相對據地以堊畫地爲山川城池狀因獻城釣魚山之策者廖孝廉事不可考 寰

宇記云貞觀九年分牂柯北界置郎州領恭水高山貢山柯盈邠施釋鷲六縣十一年省十三年又於其地置播州取播川爲名仍復六縣其明年改恭水爲羅蒙縣高山爲舍月縣貢山爲胡江縣柯盈爲帶水縣邠施爲羅爲縣釋鷲爲胡刀縣十六年又改羅蒙爲遵義縣二十年以夷州之芙蓉瑯川二縣來屬顯慶五年廢舍月胡江羅爲三縣景龍三年陞播州爲都督府先天二年罷天保元年改爲播川郡乾元元年復爲播州 寰宇記云畚陵山在遵義縣東四十里夷牢水西自帶水縣來東流經縣北一里又屈



曲南流入癡胡刀縣界帶水源出舊縣西大山東流  
經帶水縣城北又東流至癡胡刀界注胡江水按唐  
永徽中癡帶水縣在府北三十里宋大觀建遵義軍  
於白綿堡亦在府北三十里似同一地 隋楊素贈  
薛播州詩凡十四首即薛道衡也汾陰人少孤專精  
好學甚著才名隋高祖除爲內史累遷上儀同其爲  
播州疑在煬帝之世詩云在昔天地閉品物屬屯蒙  
和平替王道哀怨結人風麟傷世已季龍戰道將窮  
亂海飛羣水貫日引長虹干戈異革命揖讓非至公  
又兩河定寶鼎八水域神州函關絕無路京洛化爲

丘漳溢爾連沼涇渭余別流生郊滿戎馬涉路起風  
牛班荆疑莫遇贈綺竟無由又五緯連珠聚千載濁  
河清金亡潛虎質閨盡自蛙聲聖期伊旦暮天祿啟  
炎精霧生三日重星飛五老輕禋宗荅上帝改物創  
羣生又道昏雖已朗政故猶未新剗舟洹水際結網  
大川濱出遊迎釣叟入夢訪幽人植林雖各樹開榮  
豈異春相逢一時泰共幸百年身又束帛賁丘園生  
芻自幽谷塵芳金馬路瀾清鳳池澳零露旣垂光清  
風復流穆傾蓋如舊知彈冠豈新沐利心金各斷芬  
言蘭共馥又自余歷端揆緝熙慝時彥及爾陪帷幄



出納先天睠高調發清意縛藻流餘絢或如彼金玉  
歲暮無凋變於松待爾心爾筠留我箭又荏苒積歲  
時契闊同遊處閭闔既趨朝承明還宴語上林陪羽  
獵甘泉侍清曙迎風含暑氣飛雨淒寒序相顧惜光  
陰留情共延佇又滔滔彼江漢實爲南國紀作牧求  
明德若人應斯美高臥未褰帷飛聲已千里還望白  
雲天日暮秋風起峴山君儻遊淚落應無已又漢陰  
政已成嶺表人猶蠹借寇北方新還珠總如故楚人  
結去思越俗歌來暮陽鳥尙歸飛別鶴還迴顧君見  
南枝巢應思北風路北風吹故林秋聲不可聽雁飛

窮海寒鶴唳霜臯淨含毫心未傳聞音路猶窳唯有  
孤城月徘徊獨臨映弔影余自憐安知我疲病又養  
病願歸閑居榮在知足棲遲茂陵下優遊滄海曲古  
人情可見今人遵路躅荒居接野窮心物俱非俗桂  
樹方叢生山幽竟何欲又所欲棲一枝稟分豐諸已  
園樹避鳴蟬山梁遇時雉野陰冒叢灌幽氣含蘭芷  
悲哉暮秋別春草復萋矣鳴琴久不聞屬聽空流水  
又秋水魚遊日春樹鳥鳴時濠梁莫其往幽谷有相  
思千里悲無駕一見杳難期山阿散瓊蘂庭樹下丹  
墀物華不相待遲暮有餘悲又銜杯向南浦寒色黯



沈沈風起洞庭險煙生雲夢深獨飛特慕侶寡和乍  
孤音木落悲時暮時暮感離心離心多苦調詎假雍  
門琴 唐韓愈作栢宗元墓誌畧云初子厚自栢州  
召至京師而復爲刺史也中山劉夢得禹錫亦在遣  
中當詣播州子厚泣曰播州非人所居而夢得親在  
堂吾不忍夢得之窮無辭以白其大人且萬無母子  
俱往理請於朝將拜疏願以柳易播雖重得罪死不  
恨遇有以夢得事自上者夢得於是改刺連州嗚呼  
士窮乃見節義今夫平居里巷相慕悅酒食遊戲相  
徵逐詡詡彊笑語以相取下握手出肺肝相示指天

日涕泣誓生死不相背負真若可信一旦臨小利害  
僅如毛髮比反眼若不相識落陷穽不一引手救反  
擠之又下石焉者皆是也此宜禽獸彘狄所不忍爲  
而其人自視以爲得計聞子厚之風亦可以少愧矣

桐梓縣

華陽國志夜郎郡古夜郎國也屬縣二千戶治夜郎  
縣有遯水通廣鬱林有竹王三郎祠甚靈響劉敬叔  
異苑云漢武帝時夜郎竹王神者名興初有女子浣  
於遯水見三節大竹流入足間推之不去聞其中有  
號聲持破之得一男兒及長有才武遂雄彘獠氏自



立爲夜郎侯以竹爲姓所破之竹棄於野卽生成林  
王嘗與從人止石上命作羹從人曰無水王以劍擊  
石泉便湧出今竹王水及破竹成林並存 後漢使  
唐蒙開牂柯郡斬竹王首爨獠咸訴以竹王非血氣  
所生甚重之求爲立後太守吳霸以聞帝封三子爲  
侯死配食父廟今夜郎縣有竹王三郎祠是其神也  
本志云夜郎里有竹王洞是其故處 九州要記云  
夜郎自古非臣服州郡之地昔漢武帝開拓南邊始  
置夜郎縣 後漢書曰夜郎者臨牂柯江江廣百餘  
步足以行船唐蒙發巴蜀卒治道自犍道抵牂柯江

卽此地十三州志云牂柯者江中山名晉永嘉二年  
分牂柯置夜郎郡兼置充州寰宇記唐武德二年以  
梓潼縣爲充州開元十五年改爲夜郎縣又云充州  
故夜郎侯邑牂柯都尉居之南中八郡悉夜郎之西  
陲也其屬縣有梓潼思王思渝底水按梓潼卽今之  
桐梓縣 志云編戶夜郎里有李太白故宅白  
坐永王璘之禍南流於此按蔡寬夫詩話云太白之  
從永王璘世頗疑之唐書載其事甚略亦不爲明辨  
其是否獨其詩自序云半夜水軍來潯陽滿旌旄空  
名適自誤迫脇上樓船從賜五百金棄之若浮煙辭



官不受賞翻謫夜郎邊以此觀之則太白豈從人亂者哉 太白集有流夜郎題葵葉云慚君能衛足歎我遠移根白日如分照還歸守故園其流夜郎聞酺不預詩云北闕聖人歌太康南冠君子竄遐荒漢酺聞奏鈞天樂願得風吹到夜郎寄內詩云夜郎天外怨離居明月樓中音信疏北雁春歸看欲盡南來不得豫章書流夜郎贈辛判官云曾在長安醉花柳五侯七貴同杯酒氣岸遙凌豪士前風流肯落他人後夫子紅顏我少年章臺走馬着金鞭文章獻納麒麟殿歌舞淹留玳瑁筵與君自謂長如此甯知草動風

塵起函谷忽驚胡馬來秦宮桃李向胡開我愁遠謫夜郎去何日金雞放赦回寄韋南陵水云胡驕馬驚塵沙起胡雛引馬天津水君爲張掖近酒泉我竄三巴九千里天地再新法令寬夜郎遷客帶霜寒西憶故人不可見東風吹夢到長安竄夜郎憶秋浦桃花舊遊云桃花春水生白石今出沒搖蕩女蘿枝半挂青天月不知舊行徑初拳幾枝蕨三載夜郎還於茲煉金骨又夜郎承恩放還兼欣克復京師示息秀才云黃口爲人羅白龍乃魚服得罪豈怨天以愚陷網目鯨鯢未剪滅豺狼屢翻復悲作楚地囚何日秦庭



哭遭逢二明主前後兩遷逐去國愁夜郎投身竄荒  
谷半道雪屯蒙曠如鳥出籠遙欣克復美光武安可  
同天子巡劍閣儲皇守扶風揚袂正北辰開襟攬羣  
雄胡兵出月窟雷破關之東左掃因右拂旋收洛陽  
宮回輿入咸京席卷六合通叱咤開帝業手成天地  
功大駕還長安兩日忽在中一朝讓寶位劍鳥傳無  
窮媿無秋毫力誰念矍鑠翁弋者何所慕高飛仰冥  
鴻棄劍學丹砂臨爐雙玉童寄言息夫子歲晚陟方  
蓬 唐李嘉祐送上官侍御詩莫問黔中路令人到  
欲迷水聲巫峽裏山色夜郎西張籍送蠻客詩借問

炎州客天南幾萬程江南惡溪路山遙夜郎城按志  
夜郎城在桐梓驛二十里有碑坊字已剝蝕明揚慎  
元夕桐梓驛詩云載石孤峯古驛門青羌吹笛報黃  
昏三家村裏無燈火千樹梅花作上元夜郎曲云夜  
郎城桐梓源東堞壘平村民如野鹿猶說翰林名夜  
郎溪槃木陰中半景西漁舟投樹宿水鳥遶花啼夜  
郎歌漢宮曾取教秦娥竹枝傳竊糾楊柳轉猗儻  
志云夜郎里有癡扶歡縣址按寰宇記扶歡縣唐貞  
觀十七年與榮懿縣同置以縣東扶歡山爲名也屬  
溱州唐書貶韓偓爲榮懿尉即此地又有癡溱溪郡



按寰宇記溱州土地所屬與夔州同亦貞觀十七年  
置天寶元年改爲溱溪郡志又有廢鼎山縣在治西  
十里不知何代設城壘猶存

仁懷縣

寰宇記云芙蓉縣唐貞觀五年置屬邠州尋屬牢州  
十六年牢州廢改屬夔州又改屬播州初置在芙蓉  
山上後移於縣東南三里之芙蓉江側此芙蓉縣之  
所由名也 寰宇記又云仁水在縣西南一里東南  
流注邠水志云仁水在宣慰司東南五十里此仁懷  
縣之所由名也 圖經云廢舍月縣在州東南九十

里唐貞觀九年於縣治置高山縣旋改爲舍月縣以  
界內舍月山爲名涪陵江在其東九十里 廢胡江  
縣在州東南四十里貞觀九年於縣置貢山縣旋改  
爲胡江縣以界內胡江爲名有巴水在其南三十四  
里 廢羅爲縣在縣西南二百里貞觀九年置邠施  
縣旋改爲羅爲縣以界內羅爲水爲名水源自縣西  
百里羅爲山出流經縣南又東流至胡江入涪陵  
顯慶五年廢城址猶存 廢胡刀縣在縣西南五  
十里貞觀九年置釋鷺縣旋改爲胡刀縣因胡刀以  
爲名水在縣南一里東流合胡江開元二十六年廢



真安州

圖經云本夷州之境與黔思犬牙其地山溪竦秀岡巒連綿竹樹茂林千里不絕物產頗饒與渝之南川武隆彭水相接壤 寰宇記云唐貞觀十七年廓闢邊築置播州鎮後因其處有降珍山乃以鎮爲珍州取名山也長安四年改舞州開元十三年又改鶴州十四年復爲珍州宋乾德四年刺史田遷上言自給賜珍州郡名以來連遭火災乞改州名詔改爲高州尋以嶺南有高州加西字元復爲珍州僞夏明玉珍避諱因改爲眞州 圖經云唐太宗開山洞始置珍

州時并置夜郎麗臯樂源三縣寰宇記云其縣并在州側近或十里或二十里隨有畚田處爲寄理移轉不定方輿云珍州有麗臯白厓思義安定壽山五堡官軍所駐也夜郎今桐梓縣樂源廢縣在治西六十里有樂道書院漢尹珍建又云尹珍以俗敦稼穡併建務本堂 紀勝云珍州有東松西松豹子羅蒙四山按二松俱在州南三百二十五里豹子在州北八里山多產豹羅山在州西南三百里內唐志有羅蒙縣言此山高遠可瞰羅蒙也 勝覽云三江者去州三十里即明溪又曰虎溪在州東十七里思溪在州



西北百八十里出南平軍與明溪合又有貫珠溪按在今治西八十里源出虹轉山下屈曲會合三江

志云楊六郎寓白鳩亭亭在古城其憩休處在三塊石足迹猶存按六郎宋太原楊業之子楊延昭也事跡不可攷又云僞夏僭號其將江中立築城以守舊州城是也真州將鄭昌孫據石城抗之今南山寨是也宋兵初至昌孫執中立以獻命得世其地按平播之後真州始加安字州判官有鄭駱二姓鄭即昌孫後也駱氏未詳方輿勝覽云宋徽宗時大駱解上下族帥駱世華駱文貴等獻地立珍州亦曰樂源

郡或卽駱之始云

綏陽縣

寰宇記云夔州義泉郡治綏陽縣在漢爲牂柯郡境歷代恃險不聞臣附隋大業七年始受招慰置綏陽縣屬明陽郡今甯夔縣西北八十里舊明陽郡是也唐武德四年罷郡置夔州於思州甯夔縣領夜郎神鳳豐樂綏養雞翁伏遠明陽高富甯夔思義丹川宣慈慈岳十三縣六年廢雞翁縣貞觀元年廢夔州仍省夜郎神鳳豐樂三縣以伏遠明陽高富甯夔思義丹川六縣隸務州宣慈慈岳二縣隸溪州綏養縣屬



智州四年於黔州都上縣復置彝州六年復分置雞  
翁縣十一年以義州之綏陽黔州之高富二縣來屬  
其年又自都上縣移於今治領綏陽都上高富雞翁  
四縣十七年又以廢牢州義泉洋川二縣來屬天寶  
元年改爲義泉郡乾元元年復爲彝州按今貴州石  
阡府所轄多係彝州地以綏陽爲舊治所故詳及之  
圖經綏陽縣有波利山在北二十里有安徽水一  
名孤微水西自綏養故縣來東流經縣南八里又東  
入都上縣界涪江水在縣東十八里南流注安徽水  
方輿云綏陽故城在今縣西三里貞觀十二年移

於今治廢城存按縣志今綏陽又移治觚竹里在眞  
州長官司西北二百五十里外 志云縣北十里碧  
霄洞澗數十丈懸石嶙峋天成萬態如刻如畫又二  
十里有三張水卽羅甘溪也其源出於古井每日辰  
午申三潮不爽焉 古蹟攷云趙家里之望魚樓旁  
有三撫墓按楊曾家廟碑三撫姓趙氏鄱陽人乾符  
初播有白龍太子之亂其父當寨團練使偕楊祖平  
之遂插草爲標於杉木堂入籍而生三撫旣長有神  
異讀書於趕水鎮嘗騎馬歸羈下拖砂石兩片今趙  
廟前上馬礮是也刻有壬戌年等字墓在廟後二十



丈許有隙可窺見其槩以鉤懸去地二尺許 古蹟  
考云朗水里之溪源地有柳宗元書院按子厚以柳  
易播尙未得請不知何以有祠曰重其義也 志云  
宋大觀初於綏陽縣置承州廢都上縣在其南二十  
五里廢義泉縣在西南百里廢洋川縣在西北百里  
寰宇記云都上縣隋置唐武德元年屬黔州貞觀  
四年置夔州縣爲治所十一年州始移綏陽有涪水  
一名泅野水西北自綏陽縣界流入經縣西十四里  
又折西南流入費州雞翁縣界 義泉縣本牂柯地  
隋大業十一年置初屬明陽郡唐武德二年改屬義

州貞觀十一年於縣治置牢州十七年牢州廢縣屬  
夔州有支離水東北自廢綏養縣流入流經縣西又  
東南流入廢樂安縣界 洋川縣亦牂柯地武德二  
年於縣東北七十里置屬義州貞觀元年改屬思州  
開元二十五年屬夔州有小水西南自廢高富縣流  
入東北經縣七十里又北入務川縣界 甯夔縣舊  
屬思州開元二十五年屬夔州 廢高富縣在今州  
東北百里隋大業七年於廢縣南三十里置屬明陽  
郡永年陷夔獠唐武德四年再置屬夔州貞觀元年  
改屬務州十年又改屬黔州十一年復屬夔州有小



水在其縣南三十里東入甯彝縣界 廢雞翁城在  
縣西南七十里武德四年置屬彝州有沱野水東自  
都上縣界流入經縣南三里又南入費州城樂縣界  
永徽後與高富縣同廢

蜀中名勝記卷之二十



